

四庫全書

集部

欽定四庫全書

集部

林蕙堂全集卷二

詳校官檢討<sub>臣</sub>劉錫五

助教<sub>臣</sub>常循覆勘

總校官編修<sub>臣</sub>王燕緒

校對官助教<sub>臣</sub>卜維吉

謄錄監生<sub>臣</sub>蔣雲

欽定四庫全書

林蕙堂全集卷二

湖州府知府吳綺撰

啓

謝宗鶴問贈李北海大照碑啓

西京捫字久失奇觀北海揮毫新分妙蹟蓋法傳仙李  
系本猶龍而刻自靈芝力真如象况茲大照文麗三乘  
尤屬舊摹品高六絕神姿英異如逢巷陌之觀意態縱

橫似得干鏤之氣展看道上應教快目于百花寶置函  
中不待追魂于一葉

謝黃于升內叔惠程孟陽畫冊啓

藝苑分華情移林壑墨莊選勝興愜雲泉惟高人風號  
松圓有妙筆嘗踰梅老蓋詩心遠同摩詰故于法外能  
精而高致絕似倪迂遂致品中稱聖久懷雅覲忽奉珍  
貽展帙而萬里非遥寧須著屐開卷而一丘自足即似  
買山始知紅豆村中應多勝賞豈令青藤館內獨有兼

長

謝汪舟次太史以雪攜舊選見還啓

迂癖難忘老去猶耽黃卷流離不免亂中寧問青箱每  
思手錄一編久已心傷十載從前避俗曾賣斗酒同攜  
向後知音憶共囊琴俱斷但只付焚書之炬未致塗泥  
若教覆賣醬之甌誰憐冰雪何幸存鄴侯之架遂能返  
孟氏之珠傳奇字以與奇人寧非快事逢故人而得故  
物更為苦心捧卷如狂開緘欲涕看當年之畫跡似隔

前生覽舊日之封題猶疑短夢從此拜良朋之賜何殊  
仙遇龍威便當付稚子以藏益欲秘同鴻寶

孫汲山餉石首魚啓

歌類馮生方思彈鋏夢非呂叟欲效垂綸蒙惠鮮鱗猶  
含香餌每逢夏至視則有光亦號春來烹而得石與三  
牙而形似較四腮而味殊用作金羹范少伯寧求鰕菜  
將同玉鱠張季鷹豈憶鱸蓴即化為鳧首猶戴德誰堪  
比鰓腹不懷芒

答江青園為子聞求婚啓

伏以天上靈辰旭日叶鳳凰之兆人間佳侶春風應鶯  
鶯之祥誼重絲蘿榮依喬木恭惟某文章華胄孝友清  
風江左馳聲種德無殊萬石瑕丘問業傳家惟裕一經  
令嗣壯志鵬騫英年豹蔚由斗野而發參野

以鄉薦於  
新貴也

不減終軍棄繻之奇易濟陽以成晉陽未改文通夢花  
之秀張祿行將作相

以寄  
姓也

嵇康已是顯名某栖托金門

浮沈粉署溯潘楊之睦雖有自來念齊鄭之交實慚非

偶弱息才乏頌椒誨踈采以貧家操作固同鮑守之兒  
陋室形容畧似黃公之女乃赤繩繫於萬里遂白璧訂  
乎三生既協著占敬從鸞信榮承篚實篋中雜剪綵之  
花遠荷幣將几上得探官之繭時人日也吳廣川之牽犬願  
效清操越北海之來龍自傳佳話殊慚報李竊比依葭  
伏冀尊慈俯申崇照謹啓

約武林同宗文會啓

浙水是文章之藪延陵為禮樂之宗季重鳳觀名高鄴



苑少微鵲起譽美唐都簪纓自古以稱隆文筆於茲而  
特盛其幸膺勝地得攬雄風展韋氏列宿之詩長憶德  
星雅聚誦李家花萼之集恒思榮木新篇僭卜中幹之  
八朝共聆大章之五色豐溪濯錦發光西子湖頭練水  
涵珠耀采伍公濤上將見天策之一十八士聯步瀛州  
不數孝儀之二十七人傳麻中壘也謹啓

謝黃孝昭送名章石研啓

花間送笋酒醉玻瓈燭下揮毫詞慚鸚鵡乃蒙隆惠用

錫殊珍篆倣秦斯幾同鳥跡寶如衛國寧讓鴈晴況語  
本于西京老此笑白雲之癖且製摹乎東井得之同青  
鐵之華藏以琅函名曰珉歟陳之槩凡比以石交倘漬  
以紅桂之膏綢繆可記若染以黑松之液溫潤不磨將  
樓上樊川益穩揚州之夢而亭中李白堪書唐苑之詞  
不須別製玉麟已司花印何待再求銅雀始資草賢

謝汪學先送綠石研山啓

竹簡橫陳欲倦毛生之穎桐圭戲剪難成管子之封幾

欲酬以中山未得貞于介石何期珍貺獲遂雅懷攫之  
米芾攜來猶帶苔痕伴此陶泓洗後尚留蕉影遂使綠  
沉朝染堪吟么鳳之詞青縷宵分欲夢神龜之字江殊  
斑竹常看錢起之數峯潭似桃花未及汪倫之千尺

答鄉先生迎還湖州啓

恭惟諸位老先生台臺道存三代品重一時雲起蒼巖  
即有為霖之望風清峴嶺嘗多偃草之功秉德無阿毀  
譽恒持乎國是處心不競是非悉當于人情顧念解組

之孤踪謬辱飛書之厚誼挽其已去之轍而冀以重來  
招其既殞之魂而呼之復起何能得此無德以堪謹百  
頓以辭恩聊一言而致感伏念某生而少賤質本多疎  
讀書而誤信古人用世而罕通時務十年索米飽少于  
饑三載專城甘仍是苦栽棠種柳寧知好且難為破柱  
埋輪總是愚而自用轉喉犯忌致遭大吏之嗔螫手成  
冤又觸狂童之怒違山十里聞蟋蟀而猶驚泛宅五湖  
見禽魚而亦畏幸而梅州嘔血暫賒鐵漢之身敢望桃

洞回頭再托漁郎之足乃蒙折簡鑒我非辜勉諭旋車  
寬其多難皇天后土實聞長者之言遠水高山永誌故  
人之德但某去為失路歸亦無家文有愧于蘇公而官  
同磨蝎道或殊于揚子而岐類亡羊聽彼婦之譏讒殊  
堪入耳遇醉人而推罵良已甘心雖顧渚煎茶頻形舊  
夢程村買酒未隔餘懷功過相權或見原于父老性情  
自得尚未忘于江湖并土重歸空有故鄉之戀玄都再  
到恐貽他日之羞若乃繫畫舫于雪中頻來訪戴命青

樽于花下暫且留髭則苔雪可以一葦而平原無妨十日矣謹謝

吳門詩會啓

茂苑名都橫塘艷曲山留劍古氣成才子雲霞水泛脂香流作酒人烟月風清鶴市主持藉葦白劉王星暎鱸鄉唱和聚吳羅皮陸嗣後而高楊繼響獨稱洪永四家于中則文沈齊驅尤見嘉隆多士斯文未墜吾道庶幾爰訂名流共襄大業入孝王之館並解篇章過石尉之

園無煩絲竹千年勝地雅宜藉卉班荆四序良辰是用  
分蘭折芰疇能結駟請觀魯國之風不待刑牲始訂越  
人之好倘登筵而有弘度直須紙染桃花若入社而得  
遠公亦可香叅栢子務使振茲大雅鼠鬚重寫于蘭亭  
莫令笑彼小巫鵲尾偏浮于梓澤則同心逸唱爭傳乎  
滄浪之亭而晞髮浮踪特附于月泉之社矣謹啓

藝圃詩成謝姜學在送名牋斑管吳草廬研馬

湘蘭畫蘭啓

月泉入社羨清翁七丈之羅雪苑分題怕石尉三升之  
酒吟成藝圃篇章未半青蓮賚及文房珍異有踰蒼穀  
韋貫之曉寒之句乃贈衍波江淹無夜夢之花徒聞畫  
日有田是石得舊物于吾家侍女成香見遺芳于絕代  
從此學書井畔復何取于種蕉將見研露窻前還可吟  
夫樹蕙永以為好陸敬游何以當之必得其名顧阿瑛  
不能及也

請獨任和尚住支硎山古報恩寺啓



伏以白象天高大法待奇人而始顯青鴛地古名流非  
勝境而不居跂杯渡之非遙望錫飛而可止恭惟大和  
尚建智慧幢作慈悲筏巖前問道曾經白雪埋身座上  
提宗久向丹霞著脚拈花一笑參妙諦于西來擊竹三  
聲振靈音而東下本豸嶺鯉湖之勝滌蕩玄風收龍湫  
鴈宕之奇宏開法海聞鐘靈隱悟與身俱執拂徑山迷  
隨指破說文字法法超文字之前具山水心心在山水  
之外蜂王臺上乃有靈一皎然獅子座中總是次宗元

亮羨黑白之緣俱盡信緇素之仰非虛況此支硎乃道  
林鶴鳴之地在斯趙墅尤凡夫鴻漸之區以高士而處  
名僧契合三生之石將今賢以續古德允傳五葉之燈  
前因豈屬偶然大道終成卓爾伏願不遺貧瘠大展鈞  
陶分甘露之餘波普灌三千蒼菴移雨花之密蔭還成  
十二芙蕖則紫竹林開鶴苑聿興于鶴市而白蓮社啓  
虎丘不異於虎溪福在諸天歡生十地矣

徵廣陵詩會啓

書馳鐵馬陳記室檄可愈風制草金鸞徐學士香堪伴  
月巨源對策才比長沙少游著書集稱淮海吾鄉夙號  
名區此日復多佳士而名流修禊僅見柳泉勝侶抽毫  
祇傳蘭里竊恐花開芍藥反欲笑人樹長垂楊惟堪贈  
客者矣綺僭約同心共襄執耳修月泉之故事締雲山  
之雅盟談詩而爭致劉生作賦而還邀枚叔華輪蠟屐  
并望惠臨紅袖緇袍無妨雜坐務使奔濤九曲盡將絲  
筆收來莫令明月二分頓使玉簫吹斷況此會惟談文

酒豈當年競長壇  
場客過玉山識顧瑛之好事人遊金  
谷遇潘岳以論交  
吾儕用是有懷諸君豈能無意

謝江秋水惠小石研山啟

毛穎論交偏宜石友  
陶泓結伴自足山情  
但九華罕遇於壺中  
似三島難尋於海畔  
何期珍玩乃出雅貽  
異狀玲瓏得自襄陽  
之袖竒姿磊砢來從  
博望之槎直欲喚以  
龍精遂可酬吾庖  
管中書脫幘小憩芙  
蓉都尉橫牀權辭  
翡翠烏皮几上寧誇  
華岳千尋紫玉潭前  
長對湘

雲一片謹啓

與江郢上徵刻宋元詩啓

夏鼎商彝代異而同為寶器隋珠卞玉人殊而悉具瓌  
姿總之各有本源未可狃于聞見乃謂三唐以後遂無  
一語可傳豈知風雅本于性情抑且聲律關乎氣運唐  
原取士世難再返三唐宋且無詩身又遶經幾宋則論  
古固為甚隘而處今不更太卑乎僕務破拘攣不辭固  
陋合三朝之歌詠歷數載以編摩菁華各取其時何碍

菊松之前後格調必裁于古無分黍麥之低昂幸見許  
于吟壇將太公之藝苑棗梨畧具賴江郎頗有同心蒲  
柳難成冀諸公廣為垂手始徵資以成卷終計卷以償  
資名列無涯與編年而俱永惠施不費可刻日以先收  
酬知我之誠良同徵管呼將伯之助是在濟陽

同宗雅集啓

延陵奕葉各在天涯茂苑飄萍俱來江上蘇舜欽就滄  
浪以寄跡因為失意之時黃魯直溯婺郡以延賓正合

戴宗之誼僭為雅會遞作嘉招月必一輪坐無期于北海席惟五器例有倣于東坡論古還以論心卜晝兼之卜夜聽琵琶而洒淚總是青衫借絲竹以娛情何妨紅袖游須秉燭請看匝地烽烟興可揮毫莫阻滿城風雨謹啓

募古渡橋赤欄啓

界有三千共說揚州獨勝橋名廿四或云古渡居先地本南郊而兼通乎西郭賞宜秋月而最妙者春波諸行

人向僅架以板梁大長者近始加之石甃鰲身聳峙掩  
映以垂柳垂楊鴈齒橫斜綿亘于江花江草旗亭近接  
常多高李尋詩梵刹比連不少宗雷問法星臨河上何  
須烏鵲飛來日在花梢便有紫騮嘶過可稱茂舉足快  
冶遊然而錦陌纔通尚有離欄未備夕陽可倚難教詞  
客撚鬚昏夜堪虞恐有醉人失足僭為短語共結勝緣  
請解金錯之五銖用締銀梁之十丈則秦鞭不恐馬柱  
堪題解蘇子之鞍何妨欹枕奏隋皇之曲可任吹簫矣



家伯成先生為陳集生贖居啓

陳子集生譽滿通都家居委巷祝融不燬久為厚德之  
遺造物難期尚少高門之報有數椽而僅存風雨在一  
家而分處弟昆七夕門庭仲容獨稱南阮三間叅佐士  
龍僅住東頭何期值此難兄仍欲售之他姓毋論種分  
鳩鵲將無取于同巢亦恐性異薰猶勢實難于共器信  
何安于一日必有恃于二天允賴大賢庇九州于廣厦  
常俾寒士輯百室以寧居特向于頓以求錢共為馬卿

而贖壁庶臥側無憂鼾睡而門前常聽商歌縱水流牀  
下皆為雨露之膏而燈借鄰家即是光明之燭矣

送陳其年衣緞啓

遙憶十年殊乖贈綰相逢一日竊附同袍君比古人是  
子難為衣食我思往事此縑出自機杼獸錦慙華祗免  
王生之織烏毛非暖寧同范叔之寒

梁溪詩社謝伯成送墨啓

良辰共賦幸逃金谷三升珍貺分貽遂獲銅臺一甕藏

之豹索字以麋丸可染魚鱗三千不減龍賓十二金壺  
灑出皆為篆籀之文玉管詩成即有樓臺之氣豈若授  
一丸于女子注易能精竟如得盈袖於神人為文可進  
受而有媿恐至磨人持以相誇還須報弟

為張諧石回祿後謀居啓

諧石張子伏鷺高品吐鳳奇才無力居城甘就菰蘆以  
處有懷負米聊為蓬蒿而行弟兄無一日之餘父母皆  
八旬之外貧緣守己惟守己而長貧熱不因人忽因人

而太熱炎飈翻海吳仙君無青鳥之銜烈焰焚林介子  
推乏白鴉之救咸陽坑內凡觸炬而皆灰已蜀市中即  
傾杯而莫雨扶牀白髮幸驚絕而重甦排戶紅顏賴狂  
奔而獲免奇書亦有乃盡取于六丁長物原無況全收  
于一丙焦頭爛額歎荒剝之難棲破壁頽垣問敝廬而  
安在誰無此岵老人之藉藁何辜未有室家少婦之飛  
蓬足憫致柳州之賀殊不近情興栗里之嗟真為拂意  
勢難少緩誼賴共成圖已再三始得城東片席費須半

百爰安巷北一椽但灰燼之無存寧能卒辦即饑寒之  
未贍何暇求安凡我懿親暨諸良士祈鑒燃眉之急共  
謀容膝之資念我輩高厦重簷尚偃仰之未足乃斯人  
兒啼婦歎獨寢息之何從或如于頓之解囊或為堯  
夫而折券施能當厄感切扶傷因其禍而救其人實一  
時之義舉合勝友而完勝事亦千古之美談是用懇之  
同心豈必定為識面

代元士姪聘繼室汪氏啓

伏以附葛為榮卜鳳欣傳于累葉薦榴呈喜鳴鳩佇詠  
夫連枝特修玉鏡之緣用獻瑤筐之悃星期是訂冰語  
非遙恭惟某官環谷名宗玉山華胄河東鳳德繡羽同  
推冀北龍文白眉尤重芹宮起譽應更聖錫之名蓮照  
分輝待草彥章之詔家聲既騰于列棨閨訓更著于遺  
經謝太傅之佳兒詞高快雪鮑參軍之女弟名蔚大雷  
既藉王母之餘恩復念伯姒之舊戚眷茲季嘏字以孟  
光一諾黃金幸無辭于贊鴈雙生白璧實有望于歌螽

聯新歡于秦晉申世好于潘楊得騏驎于東鄰即是當年猶子合燕鶯于南國遂為累世懿親序卜林鍾時當載魄來溫風于席上不障鸞紗寫初月于天邊即成螺黛辰而出辰而入巧合乘龍宜爾室宜爾家歡迎秣馬伏願電從愚請海如妾儀烏鵲橋邊用渡天孫之駕鳳皇臺上還聞帝子之簫

謝蔡少君畫鳳啓

車飛漢殿不樂人間簫引秦臺徒聞天外何意綵毫之

點染因成神羽之和鳴豈有桐枝方知六象非關竹實  
忽致九苞借丹穴之靈毛圖成比翼用紅窻之偶影繪  
作雙栖足堪驚彼超宗豈但方于鑿齒地殊扈閤條來  
天姥之觀人異潁川長奉星娥之製矣

金少君畫洛神啓

金鏤遺魂夢感陳王之枕采旄含態香生王令之書人  
但賞其弘詞世罕傳于妙蹟何期藻管近出蘭閨花欲  
言情波如動影依稀蓮襪凌千頃而姍姍彷彿桂旗望



三秋而眇眇想見臨池染翰原借照于當身定知拂鏡  
穿衫必含情于微步呼之欲出不堪褰捉畱仙念此如  
狂敢冀筆摹垂霧倘點仲姬之墨朱烏晨開便來甄女  
之車青鸞夜下

約友鄧尉山看梅啓

春來陌上僅得三分風到人間初傳一信吳王舊國長  
畱未斷之香鄧尉名山猶剩不殘之雪夢回綠鳳三更  
難醒梨雲行撲紫驄百里盡迷花霧何年玉樹足亂春

愁此日銅坑偏宜野興况何郎東閣看來絕似鄉人而  
逋叟西泠種就有同妻子誰使山中之寂寂空憐隴上  
之垂垂爰約素心共舒青眼籃輿竹杖不須豪客相誇  
濁酒素琴無令美人俗吟高明月儘翠羽之啁嘈字  
染寒香見黃昏之浮動從此青鞋踏徧樓閣夫七十二  
峯免教玉笛吹殘屐冷于一百五日矣

請澹歸大和尚住黃山啓

伏以大法三千年而始振待啓金輪名山五百歲而重

開遙飛錫杖紺龍夜仰白象秋高恭惟某慧解彌天慈  
恩洽日劉安世之直節曾居鐵漢樓中蘇子瞻之奇才  
再入金仙坐上辭囂得悟早知靜掃雲烟為法尋幽已  
識飽嘗山水丹霞密印普聞獅子之音白雪重叅直接  
蜂王之乳曹溪滴水偶然流到香溪庾嶺飛花忽爾經  
過吳嶺雖三宿頻遷聖哲不留情于桑野而四禪均利  
人天胥有望于旃林惟此黃山昔存丹竈軒皇受籙赤  
龍始闢金壇媼后賜書青鸞爰傳寶相林皆蒼筤自有

餘香峯是蓮花生成法座倘能惠然竹杖不惜渡以木  
杯則雲停四鶴何殊迦葉重來地湧千猊共見維摩示  
現雖流沙泉畔或無長者黃金而洗鉢池邊又點生公  
白石矣

敘吳紫三夫婦助塋啓

茲者亡友吳子紫三早歲能文夙擅雕龍之譽英才不  
偶未舒展驥之心破鏡先傷慨符融之棄野碎琴旋慟  
歎張劬之無年淚盡山陽空悲殘笛哀生蒿里莫掩遺

棺雖繼妻獨矢栢舟宛頸徒憐寡鵠而嗣孫猶嗟葛帔  
資身祇類窮鳥况兩柩縱橫多年暴露非有桓魋之石  
既速朽以堪虞難求尼父之車必重封而不易計欲安  
其窀穸惟有賴乎知交昔城下餘魂尚沾恩于陳寵路  
旁游子亦蒙惠于王忱矧我故人實存舊誼幸為後死  
敢忘一日之知願以微資共妥九原之魄雙埋廣柳寧云  
塚結鴛鴦并剪荒榛但冀穴除螻蟻嗚呼子期既謝惟  
餘長恨于鳴琴許國重來豈不齊芳于贈麥謹啓

謝崔蓮生轉運取還宋元詩永鏤板啓

十數載之林泉幾同麋鹿六十年之燈火竟作蠹魚偶  
因風雅之衰遂有宋元之選知者罪者未敢秘之枕中  
簞之揚之乃致疎于櫝外何來某甲妄窺一甲之藏本  
不識丁竟作五丁之取以竒書而辱于駟僮酷已甚于  
秦灰非仙篆之遇神人恥難辭于漢溺惟我蓮生先生  
熙朝碩輔開代真儒聖主識其清操大臣推其治行方  
之廣川子而功德已遍於民生紹乎廬陵公而文章式

行於士類心存揚善不遺彤管之編力任化頑遂探青  
箱之錄謂此輩腹惟堪鼓寧用貯書且多年手熟持籌  
何容執卷神機巧用毋煩雷電於青衣雅籍重歸復觀  
日星於丹簡蓋威嚴可懾不敢倒亂其篇章且恩德所  
沾亦可畧明其鏤刻行見豕魚不混桓君山不待重鈔  
梨棗如新和魯公寧須再訂詞壇鼓舞藝苑流傳信風  
人必屬正人有快事乃稱能事獨回風雅感非一己之  
私共矢詠歌澤及三朝而後言而匪佞頌已無諛

謝丁鴈水惠佳綸珍茗啓

餘薰弄暑疏涼絕愛冰絲衆病歸秋消渴偏宜雪枕憶  
含風之細葛天上空傳採騎火之仙英雨前稀有何來  
隆惠並係珍貽既霜越之遙頒復雲腴之俯錫光生白  
疊五銖蠻女之花香泛紫茸一串清人之樹練開疊幅  
織成必自鮫宮印啓斜封送到如來鶴嶺見陸閔之單  
製已知美過會稽共李泌以親嘗不復奇誇陽羨服之  
無數不沾洛下之塵味此靡佳已愈茂陵之疾感盈千



縷寵異六班謹啓

珠江詩會啓

城開五穗名區久肇仙羊田種萬花勝地尤傳寶鴨趙  
佗西拜尚聞車馬之雄郭璞南來大有衣冠之氣是以  
珠江浩渺古今不乏才人瓊嶺峩峩來往更多奇士文  
高區冊卓然立就千言才蔚國儀宛若飛流百尺夢得  
海陽之詠韻寫溪山昌黎廣利之碑藻浮星日昔云盛  
矣今偶缺如茲值文運廣敷慶鯨濤之甫靖更當韶光

早換喜鶯谷之方遷遊子善懷每關心于令序幽人多  
暇豈無意于曩時僭約如蘭爰謀藉卉木棉林下咸傾  
鸚鵡之杯盧橘花間並染鳳凰之管則爭裁麗句其何  
羨于蘭亭而各得勝情可有同于栗里鶴舒臺上盡看  
碩彥偕遊燕喜亭前却羨耆英再見至于東林禪侶何  
妨共著紅樓若教南國佳人亦可遙傳玉鏡人來金谷  
皆可論交客過玉山俱能賭酒諸君共成勝舉吾輩同  
愜雅懷謹啓

澄江詩會啓

延陵故里猶傳君子之風申浦澄波尚有名侯之跡山  
名覆酒遊人常欲飲醇逕可採香野老還聞留馥嶺分  
南國接勝氣于盤龍水似西陵挹流泉于跑虎况乎郭  
景純之博雅信是神人李嘉祐之寬和正稱詞客風雅  
久傳于二島文章歷重于千秋矧今仙令之才已同入  
洛嗟我羈人之况頗類游梁僭約同心共謀攜手登高  
作賦聊為尋菊之盟望遠興思共遂班荆之願仰祈憑

軾俯慰東橐

謝閻牛叟貽唐伯虎十美人卷及唐鏡啓

鄙文未就雅貺先頒披明月而在函如逢照膽識春風  
于開卷得見捧心雙手頻抄想花中之倚鳳十眉爭艷  
感波上之驚鴻喚以約黃或臨妝而欲出觀之東素咸  
斂笑而不言好我實多顧影形而俱麗銘君良厚矢心  
目以無諼敢不抽彼兔毫更拂珊瑚之架獨是慙無鴻  
藻難克琬琰之長

謝汪扶晨送畫扇古硯啓

炎涼互變感在風人追琢為章端由石友况筭篋之愛  
在山水而彌殷若筆墨所資歷歲時而成壽何期一日  
獲貺兼珍幸拜下風庾元規塵將自遠長研曉露李衛  
公交且益堅

東懋叔姪索橘酒啓

法異中山難逢白墮睦殊西市罕得黃嬌忽蒙家釀之  
傾似飫仙厨之醞露荷葉莫比其芳雨潤椒花寧同

其勁酣而竟日豈復問其低昂澆此芳春幸得同乎歡  
暢况滋分楚頌適有合于放臣而趣等周醇更有侔于  
良友以茲神往用寫心勞分餘瀝于油囊言斟翠物得  
全神于金罍不羨烏程頌德贊功將見謳歌之滿座除  
憂來樂應知福喜之入門

謝家東巖惠西洋蘭香娑羅子河清酒啓

種奇芬于南土蘭亦名珠結異馥于西溟樹皆成寶羨  
美人之記曲字字紅兒愛達士之忘憂時時翠物方在

旅中而多憶實感門內之深情從衆香國來香應非一  
是相思種子思豈無端况原釀自激波并得貽于豐水  
花開魚鱗早知金粟前生烟吐龍涎似得蘅蕪半夜何  
須架筆看來色比珊瑚但得浮觴最喜光如琥珀沾身  
而馥郁奚但三朝入骨以玲瓏寧堪一擲信醉心之雅  
不復同人而飲醇之深有踰中聖矣

洪雨平惠茶米蜜餠花啓

離居寂寞忽見寵頒厚意慇懃還承遠貺丹心疊用甜

何論于中邊苦葉都無涉寧疑于深淺消相如之渴殊  
勝紫茸濟方朔之饑堪稱白粲遂使泉得烹于陸子竟  
欲成經粥不食于魯公無煩作帖離離朱實自可服之  
如神纍纍瓊英馬能繫而不食將遺通子非梨栗之能  
同歸語家人有饗殮之可代信堪飽德匪待獐牙良足  
蠲疴無煩鳳髓報而無物有心但切于蕭琛謝恐難言  
無口獨慚于李亢

家鳴夏惠佛手柑啓



蒙惠竒芭實為精品種本分于平蒂名則號為飛瓊雖  
有頽而有黃欲指天而指地多伸直節單拳獨證禪機  
畧似柔荑一指爰成善果得旃檀味居然相好黃金探  
摩尼珠竟若光舒素手通于鼻觀汝不聞乎嗅彼芳香  
吾無隱爾設之座上寧須荀令熏衣供在龕前便似瞿  
曇說法包以黃羅之帕應如爪落霜痕攜同蠻榼之尊  
何必釀成春色銘德惟當合十言謝豈憚再三

答家梅莊惠古銅水注啓

捐惠珍貽實稱清玩用資挹注何來百鍊之精體賴虛  
容遂有千年之質金為土蝕土蝕而金色愈章水藉金  
盛金盛而水痕易潤斑凝古翠雅足承雲點雜靈砂元  
堪滴露是以置之悲凡能成博士之名伴以寶泓不愧  
中丞之號楊公寫梵無煩靈鵠御波李主填詞豈待神  
蜍吐水綺方慚才盡自嘆文窮忽蒙銀鹿持來似得玉  
蟾頒出喜應倍昔行將報以素心感實殊常切願銘諸

丹腑

答洪待臣送鴛鴦鎖鷓鴣香啓

碧瀾拋綬久釋累于北門紫陌含毫獨銷魂于南國笑  
張吏部之行處響動一時羨荀令君之座間馥畱三日  
何乃惠分珍貺并皆品重文房魚鱗歲蕤各種炫黃金  
之彩龍涎馥馥一函聚綠結之芬羨慧匠之巧心無形  
不肖感詞人之芬澤有佩皆馨寶笥交聯解難開情中  
韓婦翠鬟婉轉行不得影裏湘娥雖則門少獸環不煩  
扃閉然而牀畱鵲尾頗愛薰燎固却實恐違心拜嘉聊

以誌德漫道昌黎洞口不倩雲封最喜徐鉉齋頭還將  
月伴惟憂性拙覓玄品以誰通敢謂文成享瑞烟而無  
忝玉匙金鎖黃庭且自完堅寶鴨銀祝紫棧時聞馥郁  
若在陸渾山水何妨關鍵長閒但覺楚澤蕙蘭亦復佩  
紉如烈矣謹謝

放生啓

蓋惟人之有殊於物以其能具慈仁而物之不若於人  
以其常多苦惱蓋皆有情性則皆樂便安同具形骸則

同知痛癢故人之身家性命多憂水火兵戈豈物之血肉肺腸甘受刀砧鼎鑊貪生而惡死合靈蠢而皆然避禍而求安即蝸微而不異魚憂網罟聞柁響而深潛鳥護卵雛處巢低而不落蟻知沒水負葉能浮羊懼遭屠聞刀即跪同有父子魔被獲而鹿已斷腸盡見夫妻雌被籠而雄為繫頸苟充其類良有不殊幸處其靈何為獨忍所以鵲知乞命褐衣見夢於蔡襄雀得全生黃花乃酬於楊寶蛇因藥傳乃矢銜珠龜免漁封還能鑄印

何因口腹致任烹熬一筋之甘而寃生衆苦一羹之美而慘聚多生我雖暫肆肥甘彼已橫遭屠割況入口之後樂亦何存而斷體之餘寃難不報所以吳唐射鹿天激其兒趙甲屠牲刃剗其腹故古人治禮有三不殺之文而哲士推恩立七不食之戒他若魯公作沼恩及蜺螺蘇子臨流德施螾蛤羝求免戮忠獻特為懸牌猿解乳孤潘樛因之折弩皆以勉行惻隱自保天和非但強抑貪饕共全物命也雅聞前輩每切陰行及歲久而人

離遂跡湮而事遠其謬思繼武用廣推仁共破慳囊贖  
羣生于湯火長詹吉日縱餘息于江湖鵠出籠中非顰  
卿之獻佞鱗歸水際效子產以施恩豈曰無情情已存  
于高厚寧云不報報必在于神明但免烹煎固吾心之  
已盡若懷知覺豈此德之能忘耶

張公蔚生徵言啓

蓋聞德至如神凡所過而即化恩流不澤每有感而必  
深麥秀棠陰此歌謠之自始月臨日照乃祝頌所難諉

也蔚生張公南越鰲臺北溟鵬奮鬚眉出衆咸驚惠恕  
英姿氣度兼人共服齊賢雅量研二京而作賦漢重弘  
才得十乘以賜書晉推博物螭頭射策文章高華國之  
名驥足騁才經術裕濟時之畧三千直上名貫斗而徹  
九重百二遙臨福為星而占一路長才無嫌于短馭暫  
試烹鮮鉅量不棄于細流還開馴雉濯纓亭上返流亡  
于洪水之餘得劍湖邊留子遺于煥陽之後昭陽鼓舞  
千年而重遇仲淹延令謳歌兩境而共爭杜衍允文允



武得多士以作周楨不競不綈撫兆庶而襄漢禮吏在  
冰而民在鏡既所到之皆然春有風而夏有雨爰無施  
而不可一垣分炤幸叨穴壁之光九里沾恩遂獲代庖  
之澤在上臺之倚重久知靡潤脂膏幸瘠土之依仁共  
喜同瞻覆載念軍儲之是賴隆其體乃以得其心計國  
賦之維艱用其才因以惜其力屏桁楊而不事寧須更  
試蒲鞭化魑魅而咸藏不待再施桃茢追呼絕響石壕  
之吏靡聞疾苦常詢賣菜之傭安問禮賢闢館惟廣察

其訐謨引客同車要常咨其利弊疏河濟運而飛挽不  
匱于堅冰煮海宣勞而斥鹵盡同於沃壤此則善政而  
兼之善教宋人傳快活之條仁聞而本之仁心漢守著  
循良之化矣若乃操堅瘞鹿却屬吏之餽遺節凜懸魚  
謝部民之供億破從前之積例何問贏餘減額內之輸  
將并嚴需索此又潔清本之天授廉介出于性成方之  
古人惟飡吳水同于前哲自運家糧者矣是以萬竈懷  
恩千屯待飽課不徵而自足知疲困之皆甦滷匪溢而

加多識凋殘之盡起關中運餉功欲比于鄴侯郡內興  
謠思已深于何武某等情殷庇厦分屬授廩陶地四通  
謬學朱公之策義又三倍幸依賈父之仁懼借冠以未  
能愧頌猷而罔嫻謹陳懿行用乞寵章垂之無窮可列  
孟堅之傳作之不愧斯為有道之碑為朝廷而得人名  
公卿可交章而奏績慶風雲于夢弼聖天子將賜璽以  
徵賢矣謹啓

姚東只五十徵詩啓

東老姚年翁歛浦英流瀛洲華盾名不殊于第五品獨  
擅其無雙賦體高華信是揚雄之匹史才妙麗知為姚  
察之兒乃筆敏八义人同文虎而樓登百尺容自元龍  
感重片言事急堪酬赤劍交深斗酒家貧不愛黃金苟  
有意以相投長傾肝膽問不平為何事輒動鬚眉誠哉  
國士之風允矣才人之致綺等雅締蘭言恒同卉藉與  
幼安而共席效叔夜以登堂聽德操之談頻忘執爨看  
劉琨之舞愛著先鞭茲為季夏之三朝適值大年之五

十萬達夫日有篇章朱翁子時當富貴相看半百寧無  
置酒之歡共羨八千可少引年之祝君能學易將為松  
菊主人吾欲言詩是頌臺萊君子

汪扶晨六十徵言啓

栗亭汪子玩鷗華胄吐鳳竒才文章本自性成孝友原  
于天亶數齡能賦對已善于楊梅早歲著書詞更華于  
菡萏星前刳股愈母疾而惟誠海內論心與人言而不  
負名卿贈紵時來韓愈之居多士盈門日滿孔融之座

獎成不吝後進恒緣以立名推解無私素交每因而受  
德雖數竒多有嗟猿臂以難封而才大不官覲龍顏而  
未遇茲當建午之月適逢週甲之期從此而孫弘上書  
終須開閣及茲而龔明按籍已合寄觴況在同心寧無  
藉手願抽珊瑚之管開五色之花光庶得琬琰之鐫祝  
千年之椿算謹啓

家希虞八十徵詩啓

蓋聞萬年之頌首先舉其令儀五福之徵究必稱其好

德爰考諸禮式存几杖之文長發其祥乃著鐘鼓之實  
則家希虞公蓋有之矣公幼多至性長負雋才里傳曾  
閔之稱家有融褒之譽志存慷慨常思珥筆而遊運值  
紛更遂乃棄觚而嘆風高萬里願乘宗慤之船地處四  
通聊挾計然之策初遊漢水物望咸歸繼寓章江家聲  
益振躬嚴三省同欽白璧之光諾始片言可比黃金之  
重焚券非關于市義造車恒望以借人輟食而行原孝  
先多因急難射書即下魯仲連最善解圍時遇盜崧翻

欲奉身而避偶逢認履不妨徒步而歸陰德有若耳鳴  
盛事難為指屈至若蒲圻設渡永息喧爭車埠成梁恒  
稱利涉伐戴灘之怪木揚帆無覆溺之憂平牛嶺之危  
途行路免崎嶇之歎堅持殺戒全物命于金刀恪奉格  
言濟民生以寶誥斯又義聲馳于荊豫仁德著于山川  
者矣茲者單闕逢年終畝在月當春王之四日為碩老  
之八旬三鳳呈毛若友聲等雅能梓敬九龍遶膝如大  
章輩并著蘭芬兆貴顯于楊家已經四世效傳呼于蕭



氏更慶雙曾彩衣曾舞于亭前白髮為歡于堂上才如  
尚父不羨垂綸齡擬潞公方期結社某等誼關親族喜  
見者英敢陳篤行之百篇用懇華章之九錫

蔣公暨李太君雙壽乞言啓

蓋聞易著巖君內外列乾坤之卦詩歌君子升恒獻日  
月之篇是以金姥木公傳諸黃老而六身二首算在絳  
人福有所徵理無不協矣如蔣公者樂安華胄邢水名  
賢自寵錫于銅符家傳彩筆迨班齊乎玉笋世駕朱軒

衍三逕之清風種五都之妙譽少能懷橘雅知陸績性  
成長更推梨早識孔融身讓乃以食繁析箸遂爾業廢  
投觚王安豐之持籌何嫌達識端木賜之結駟益見名  
儒諾比於金何千金之足重潔同於璧雖百璧而不渝  
若樊重之分財里皆懷惠如彥方之守正盜恐知名魯  
仲連之解圍射書必下原孝先之急難啜食而行既余  
影之無慙復幃帝而有禮暨乎李氏太君肇仙踪于指  
樹賣慧性于頌椒入司隸之家何辭挽鹿居處宗之室

更警鳴鷄夜績堂前時作逸勞之訓宵吟燈下長陳禮  
讓之篇百口乃致以名橋三黨咸因而舉火何無何有  
解雜佩以相將乃積乃倉費餼糧而不厭用承先者而  
即以啓後以教子者而即以貽孫是以蘭桂相繼以爭  
芳乃見椿萱並榮而並茂萬石君之家聲更廣五世卜  
之祚業彌昌今者歲在騎羊慶宜酌兕當西池誕齡之  
際懸錦悅于秋初隨南斗授籙之先舞綵衣于寒孟憶  
前此之十載賓筵曾叨寵于設樽矧今此之一時盛典

復膺榮于錫杖黃眉白髮既攜手以俱仙驥種龍兒復  
同心于肯構歷乎甲子皆餘四百之齡守厥庚申亦滿  
三千之行故一門之內或彈琴或製錦而諸昆皆效力  
于皇圖三世之間若鼓篳若鳴絃而長孫早馳名于文  
苑猗歟盛矣寧有量哉某等誼忝登堂分宜捧觴敢乞  
靈于燕許藻發珊瑚庶闡德于陳荀芳流琬琰則飲千  
日之酒可慶無疆而封萬歲之鄉爭傳不匱矣謹啓

家孺立暨余太君雙壽啓

蓋聞青裾邁世拜金母以成真絳節朝元偕瑤姬而證  
道斯為尚已莫可幾焉何若懿德弘宣徽儀朗映流芳  
彤管衍慶祚于一門著美青箱貽芳名于百世齊眉偕  
隱循內則而無愆攜手相莊卜女貞之終吉閨儀是賴  
家道克昌如吳母余太君者也太君為孺立公之淑配  
而諸昆李之慈親也裔出富山門高歛浦秦邦受姓家  
傳四諫之聲楚國分支胄衍一元之秀性生淑質不待  
染于朱藍天賦柔儀匪借華于粉墨入謝家之墅常聞

詠絮才情得王國之風雅具采蘋德性蓋自其曾大母  
栢舟勵節久著冰操萱寢貽行常多霜節而太君承顏  
堂上受訓閨中靜婉有所自來溫恭由于師事實稱佳  
婦歸我寒宗祥女登堂俾百年而偕老名姝入室致九  
族之同欽鷄黍維虔力任蘋蘩之重鹿車共挽躬親井  
臼之勞振家聲于中落之餘豆區釜鍾之必謹相壯業  
于方剛之際内外上下而咸周念夫子以躬耕而養其  
親垂十餘年而不倦迨大父以耄耄而捐乎館歷四五

省而未歸為健婦以持門賴碩人而當戶耕問奴而織  
問婢寧藉蒼頭左或圓而右或方惟憑赤手遂使長女  
服其身教既絕粒以殉夫諸子奉為心儀皆勤修而象  
父蓋孺立信義行于列郡九州多慕義之人齒德重于  
諸侯三事修禮賢之典皆閭儀之內助碩德潤于本根  
致道譽之日隆駢祉施于來葉茲者歲當逢酉迨夫春  
始建寅為上浣之十朝介純禧于百福宣文君之絳紗  
猶在崔太母之丹轂還來雖鶴髮同心莊椿較餘六載

而龍文繞膝寶桂已茂五枝舞彩堂前蘭生未已衆香  
國內芝秀非常豈不盛歟是可頌也敢乞江毫之五色  
用褒魯哀之一言則文重鼎彝永賴仁人之贈而詞高  
琬琰弘瞻君子之光矣謹啓

家贊公暨徐太孺人六十雙壽徵詩啓

蓋聞家有嚴君配兩儀之位妃為德偶儲百世之祥第  
好德重于箕疇而德莫先於孝義獨行原于周禮而行  
尤始于睦婣歌麟慶于未央卜鴻禧而方大則贊公偕



徐太孺人實惟其人用當斯慶矣公少多至性長懋懿  
修懷橘豈待六齡讓棗寧辭七歲博窺經籍廢書于陟  
岵之辰雅好交游投筆在登堂之際家雖中落晨昏必  
膳雙魚志切先謨江漢時將駟馬一成一旅興厥祚于  
既衰三縮三盈纘前功而弗替德施宗黨咸稱長者之  
風義著寰區動以古人為法憶在甲寅之歲亂生戊巳  
之屯赴義臨川首壺漿而先倡論交泮水矢金石於後  
彫諾重片言遂能全其妻子名存一邑卒無愧于死生

迨乎楚成操戈郢人沸鼎十五年後重聞風鶴之驚百  
萬軍前不損元龍之氣受故人之重託有同李布黃金  
出巨寇之凶鋒竟返相如白璧不遑寢食惟思窀穸未  
安每減餼糧冀卜隴阡之吉他若完婚毀券皆為陰德  
全功至如恤寡懷孤尚屬平居細事而徐太孺人族高  
東海好締南溪婉孌本于性成賢淑原于天授既鳴鷄  
而推枕或弋鴈以由房厨下嘗羹獨諳姑性堂前進服  
每為時寒李光進之家不私管籥張孟仁之室迭乳嬰

兒常脫珥以易書用資聞見每具觴以延客冀廣切磋  
相夫既已為龍訓子還能似鶴漢若成家有道已看名  
振一時鳴夏華國能文行且譽騰千里茲值建申之歲  
并逢周甲之期月在清和四日先懸錦悅時方仲冬中  
浣即設瑤弧蘭以春桂以秋兩世見鵬搏之盛椿以冬  
萱以夏一門歌燕喜之祥獻其觥籌繞堦前而舞綵銘  
諸鐘鼎登座上以抽毫伏願錫類推仁竚待賜之華袞  
引年致頌必將鏤以丹彝謹啓

羅母吳太君六十徵詩啓

長沙紀績爰傳白雀之祥渤海成仙每屬綵鸞之異蓋  
殊休必生于華胄而靈跡要出于淑媛理有相需福無  
或爽於斯為盛雅足稱奇則如蘋洲羅先生元配吳太  
君是其人矣先生世履朱纓家承黃甲高祖父聞野公  
榮膺秉鉞壯鎖鑰于北門曾大父虛舟公職屬司衡重  
干城于南部雖當末運值文學而中微然豈弘才有節  
推而繼起世皆稱為國士謂當配以淑人太君承遙胄

于延陵受家風于內翰才高咏絮早擅鳴鳩德裕米蘋  
終當秣馬既稱佳婦用事良人盡夜披衣每焚膏而助  
讀中宵推枕常伸紙以候書雖勸學無待于呂榮乃贈  
鏡有同于徐淑成名之後操並警于鳴鷄服官之餘廉  
更箴于瘞鹿持毫對泣為刑狀之非輕執燭相規勵觀  
貞于不敗既而天傾莫補海涸難填寡鵠懸帷經三秋  
之風雨孤鸞舞鑑歷屢歲之雪霜却賻贈以名廉不為  
清白之累束詩書以成教無忘忠孝之模九柳氏之熊

寧知異出養樂家之豹行見大成茲者歲在壬申期適逢乎週甲月當癸丑慶用協于長庚恐母德之不傳用希鼎呂述閭儀于既備仰藉球琳伏冀推錫類之仁流芳斑管斯乃作傳家之寶振彩彤編矣謹啓

張母盧太君六十壽啓

劉子政著列女之篇惟傳令範魯僎斯作壽母之頌允尚芳規况得配于文人信足彰之彤管且贊成乎循吏尤足顯以青編如張母盧太君者早毓韶姿生傳慧質

本出范陽之冑門第高華復鍾淮右之靈帷帝肅穆蘭  
芬幽谷孝友亶於性成芝茂崇階詩禮聞於世習爰師  
古烈鳴鳩而夙慕梁鴻恥事庸流挽鹿而終歸司隸我  
詞臣先生蜚聲桂籍停船曾覓孝廉從政花封繪像共  
傳仙尹恩流鄮上洵堪為表百城字寫屏間遂乃受知  
三輔承塵下鵬賈誼乃不永年庭屋啼烏荀采遂甘孤  
宿心堅茹蘖寧知身是孤鸞教苦丸參乃致雛成大鶴  
嗣君天秩雅負時名以終賈之妙齡文壇獨步具荆關

之能事藝府兼遊茲值庚午之歲爰當己卯之辰節距  
中和時方午日筵開燕喜褰啟六旬堂上萱花鶴髮欣  
逢週甲堦前芝草鸞章佇慶長庚宣文君之耳目未衰  
猶褰絳帳郝夫人之神明特茂已授紫綈用懇賜以瑤  
篇傳徽音於奕世必且鐫之寶鼎介蕃祉于名宗謹啟

林蕙堂全集卷二



欽定四庫全書

林蕙堂全集卷三

湖州府知府吳綺撰

序

遊豐臺詩序

時當豕渡之年序值螻鳴之月青陽既謝而媚景猶妍  
朱律初調而鮮雲未燠言邀勝侶用訪名葩結軫青門  
觀晨霞之映袖連鑣紫郭訝微雨以吹衣始則巾墊林

宗布席於襄陽池畔既而觴傾叔夜聞笙於緱氏峯頭  
銀竹蕭森泛紅泉而遞響金柯掩靄籠碧岫以成陰仙  
人多好樓居况湖海足元龍之氣上客何妨末坐更江  
山助司馬之文于時茅屋鷄翁應齋鐘而破午竹籬鳩  
嬾隨野屐以呼晴還思漆水之游並鼓剡溪之興連翩  
寶絡競踏香泥宛轉吟鞭爭穿宿莽方追踪于錦市迺  
流睇于花田香共一風色分千畝嬌紅髮鬢並誇金線  
之姿膩白逍遙咸看玉盃之樣盛則楊家之春隊粉亂

花繁麗則漢殿之晨粧烟啼露笑搜劉放之譜尚覺未  
詳吟謝朓之詩猶疑不盡豈止四枝插帽奇見廣陵十  
葉承盤穠云東武而已哉況乎一日之間候交春夏移  
時之頃景備暄淒聚六地之詞英成終朝之勝賞同心  
卜晝寧無紀事之篇婪尾留春可少緣情之作各拈三  
韻共奏四聲庶北館清游繼華風于鶴蓋西園雅集傳  
逸韻于兔臺也

瑞陽阿集序

瑞陽阿者明僉都御史長信江公之文集也公生居歙  
浦系本瑕丘誠意正心方童幼而名如曾子先憂後樂  
為諸生而志比范公釋褐登朝霜厲彈冠之日單車受  
命風清負弩之塵烏草陳艱獻讜言于端宸朱衣辟惡  
取弱卵于危巢于是清流咸許為正人

聖主尚嘉其直節參差露栢首簡烏臺凜冽霜條先巡赤縣橫  
穿豹尾五色棒碎貴戚之車直叩螭頭三尺堦借尚方之劍直  
聲震世本無意于沽名慙語驚天曾何心于忌器譬除

鷲鳥鍛其翼而不患飛颺若剪神叢去其枝而無勞斤  
斧遂使大奸距脫密禁煬銷壯懷益矢于有為毅邑更  
嚴于無禮鐵冠捧牘劉整為之心寒繡節行邊李愬因  
而膽落殆有過矣豈不偉哉既而法曜移星卿輝比月  
張堪之為光祿白馬重來潘尼之領乘輿黃鸞不爽而  
忠謀益奮雅志弗酬雖疏傳乞歸欲勉留于盛世而賈  
生不見終失意于貴臣于是息影巖阿逃踪烟市萼香  
野水思歸寧為鱸魚楸拱寒阡助祭長來烏鳥鄉人罕

觀其面土室獨閉者八年天子忽念其言銀信驚傳乎  
一日辰溪建幟秋清浮竹之波沅水寨帷春滿采菱之  
野爰由佐臬晉陟祥刑得定國而獄鮮冤民見有功而  
囚無死法判終不改誠難顯奪其權官為量移實則陰  
鉗其口維時山危銅鼓伏莽潛滋地阻石門弄兵多有  
謀猷克壯于方叔威信兼用于武侯仗鉞渡瀘百足失  
乘墉之險揮戈入箐九頭息吐霧之妖乃任者之難不  
及乎議者之易而邪人之巧偏中于正人之疎大用不

竟于朝廷長才遂終于道路趙清獻家惟琴鶴豈有餘  
財寇平仲地少樓臺空留正氣嗟乎時當萬厯運際六  
符廟謨方肅于委裘庶績咸熙于鼓瑟而公也當不諱  
之朝展無私之學攀裾高論折檻危言其抗奏于中臺  
也則豈遇邪而必觸其對揚于列署也則鳳覽德而長  
鳴其鎮外而陳言也則所至銘沉碑之德其居家而紀  
事也則隨時懷戀闕之忠蓋古栢長松不足以方其勁  
直驚雷疾電亦無以寫其激揚雖蒙賜筇之知不救舍

沙之射既屢伸而屢躓亦轉煉而轉瑩遂致遇似屈原  
滿卷是離騷之字才如賈誼一生皆痛哭之時直道難  
容于茲信矣讒夫可畏抑至是乎余本放臣適逢歸里  
述舊德而動蒿高之仰覽遺書而興湘縈之悲爰草數  
言弁諸首簡噫嘻已矣久而始定難再問之斯人後必  
可傳尚有期于當代也

懷舊詩序

顏延年作五君之咏意本懷賢杜子美賦七哀之篇心



存悼往予生也晚及少而孤霜野飯牛徒作歌于早歲  
天衢附驥曾奉教於偉人憶索筆以遊吳迨驅車而入  
洛才非杞梓謬辱品題家本菰蘆長逢獎藉仙同荆楚  
奉文酒於朱軒客過苻離聽音聲于絳帳始平問業菁  
葱槐樹之街安定談兵燦爛蓮花之府他若拜張華於  
冀北世號龍門或者望仁傑于斗南家傳牛炙莫不恩  
深說項感重識韓景杲日之常中仰高山其未艾然而  
緬懷知遇盡屬賢豪略計平生亦多零落燕郊伏櫪馬

已失於孫陽蜀道攜琴鶴早辭乎趙忭江東坐上無復  
飲醇鉅野臺邊徒傳挂劍或情殷適館或誼切趨庭或  
交深于患難之中或契合于文章之內咸蒙恩于國士  
將傳美于後人而彈指十年傷心兩世平原已往誰買  
繡絲孺子長貧難賣絮酒奉文仲事君之教但有哀傷  
念張堪知我之言何勝感慨夢中得句聊寫怨于麟毫  
醉後過門實街悲于馬筆爾

按此後原本載懷長沙趙尚書開心河南周侍郎  
亮工太倉吳學士偉業江都孫廷評鼎七言律詩

各一首并略注其交遊之舊於各詩下但考四詩  
備載後第十七卷七言律詩類中今刪此存彼以  
免複出

### 宗鶴問詠古蹟詩序

春風錦纜吹盡楊花子夜瓊簫弄殘明月李太白于此  
傷心鮑明遠嘗為作賦予友宗子鶴問少長崑岡曾逢  
滄海詞章敏贍本陳琳之鄉人寄託遙深信少文之宗  
子筆開五色隋宮不落之花琴響四山嵇氏未傳之曲  
而生平慷慨時時欲近酒徒身世悲涼夜夜惟看劍氣

況復身逢五代眼見六朝海水羣飛天星晝見兔葵燕  
麥生於彈指之時春草江花即是按歌之地子山歸國  
蕭瑟奚辭袁虎泊舟淒清何已慨賞心之不再恐勝跡  
之終湮于是拂草尋幽披荆問古弔舊壘于秋風之下  
訪殘灰于劫火之餘或苔長經幢無從問偈或雲迷藥  
市何處逢仙或燈火銷沉欲醒青樓之夢或池臺堙沒  
徒嗟紫閣之輝莫不把筆低徊停車太息寫奇懷于魚  
鱗騁逸思于兔毫義取風規可識興亡之故詞兼哀艷

多由衰盛之間實興志之所未詳亦詞林之所罕有豈  
獨禹王碑碣致太史之留連丞相祠堂動拾遺之感慨  
而已哉嗟乎登廣武而歎時少英雄望梁甫而吟誰為  
管樂百端交集千古如斯問結柳之里娘誰為是者聽  
庭花於商女我始欲愁矣

空翠閣雅集序

宿耀丹鶉風清黃雀披襟可賦楚宋玉以之登高載酒  
為歡歐陽詹因而玩月維此時也信可樂乎而余友江

子秋水以終賈之英年具曹劉之逸韻觴飛北海四筵  
鸚鵡之盃榻據南樓百尺芙蓉之席火珠不熱反號招  
涼玉鏡恒圓自能忘暑而蓋傾千里琴響四山邀作賦  
之興公遇吟詩之祕監桃花潭上踏歌惟許汪倫修竹  
徑中策杖還來蔣詡況呂安命駕遠挈茗水之舟鄧郁  
懷經來泛吳陵之楫咸氣臨于函谷共星聚乎潁川而  
且趙家合德自具奇香張氏麗英長持紈扇惟參軍之  
好客絕少倦容致漫叟之多情渾忘羈思昔者延酒人

於河朔半是英雄聚名士于鄴城盡皆文學以今方古  
迨為過之僕本故人逢茲盛事聽吹簫于橋上無負月  
明望却扇于樓中有同花並含毫獨咏聊成平子之詞  
擊鉢同廢可少陳王之作爰題諸簡以紀其時

和周太史夢鄭侍御詩序

侍御鄭君晦中與予生同維梓學共編蒲鵲薦一經并  
入扶風之帳鱸飛六館偕看洛下之碑予以柔兆之年  
獲含毫于鳳沼君當屠維之歲亦射策于龍墀東閣吹

藜曾分青硯西臺列栢獨佩卓囊既立仗而常鳴亦伏  
雷而屢進年如賈誼偏多痛哭之書氣等朱雲欲請尚  
方之劍都人為之斂手

天子因而動容方謂聚號蘭臺偉望自騰金馬豈意歌  
傳蒿里靈符遽下玉魚朝野咸痛哲人歲月有同隔世山  
陽橫笛夕照淒然流水彈琴春風渺矣慨靈光之猶在  
誰念三同懷遠志之無成徒嗟一出茲解淮陽之綬還  
停下澤之車拜德操于牀前重披雲霧過黃公之壚畔



已隔山河其尊人休園先生出新詩以屬和則好友怨  
菴太史紀異夢以銜哀讀未數行淚零雙袖人天迴別  
憑文字而猶通生死懸殊賴精誠而若遇理原靈契事  
屬曠聞方在遷延未遑賡報乃素屏支枕莊周偶適於  
子徐而玄冕垂纓元伯疑來于髣髴班荆論舊如看梁  
月之顏屬草陳辭欲寫江雲之作是可異也能不悲乎  
爰呼銀鹿以篝燈遂滴玉蜍而走筆壽陵顧影渾忘學  
步之非邛嶺望墳不禁拊心之切況乎先亡踐約祇一

見于人間遠涉尋歌不再逢于石上而頻傳影響畧似  
平生白馬素車方待巨卿執紼長楊修竹旋期越國抽  
毫眷戀鶯鳴留連魚素豈非名賢謝世終結習于修文  
才子生天難忘情于慧業誰其似者望虎賁而不來我  
所思兮作驢鳴而竟去辭依四韻慟極千春

玉京啓手暫相留轉眼俄傷逝水流七載未完君父  
恨兩宵分送友朋愁燈前起草傳遺事石畔聞歌憶  
舊遊我欲招魂空剪紙他生應傍鄂君舟

金焦紀遊詩序

山擬戴鼇碑傳瘞鶴據中冷之上樹影鐘聲迨北固而東天風海霧青浮兩點久欲拏舟翠挹三峯猶虛著屐而馨聞吳子獨具幽情言偕勝侶浮玄真之孤棹夜宿蘋花攜仲若之雙柑秋尋桂樹停橈月下醉喚魚龍布席巖前坐分猿鳥既而杯酣興起曲罷情生問處士之遺踪茫茫水國尋仙人之舊業渺渺山雲留連乎江海之交惆悵於古今之會扣舷長嘯何年明月南徐振舄

高吟此夜大江東去爰書樂事用紀新篇比枚子之觀  
潮思雄七發若梁生之陟嶺聲激五噫思其中懷良多  
寄托者矣若乃賦湘靈之鼓瑟調似仲文咏羸女之吹  
簫詞如子美荷裳美屋根本靈均霞散波澄源流謝眺  
則非僅江山之助而得於性情之微也既羨先鞭遂題  
首簡豈終付之臥游聊自抒其神往耳

黃玄龍先生詩序

蓋聞昌黎大道得李漢而方傳供奉豪吟依陽冰而益

重古人腐毫作賦幾至忘年落齒成詩嘗為廢食而不  
遇表章遂多湮沒揚子雲之著述徒付醬瓿鮑明遠之  
文章長嗟蕭艾古今同慨可勝道哉予稚齒受書髫齡  
負笈綴幡道上早見甘公避雨中曾逢郭泰蓋於語  
溪官舍得見玄龍黃先生焉先生長爪通眉有同昌谷  
千橐萬狀絕似少陵偶停綬嶺之車暫駐臨邛之駕維  
時予內父堂上鳴琴先大夫山中命履松園處士傾蓋  
來遊檀園高賢臨關欲度并入西園之坐同銜北海之

觴而先生每聽狂歌偏知李泌時來染翰獨愛羊欣曾  
幾經時俄成隔世芸瓜何處長懷風樹之嗟叩策空歸  
但積山丘之淚典型凋謝心賞都非而先生亦從舉羽  
以登臺徒效魯連之蹈海玄經零落誰訪揚亭黃石淒  
涼難尋漢祀茲值菰城之解綬適來梓里以停車而內  
叔于升先生授此一編俾之重訂言尋舊諾無忘易簣  
之辰為廣遺書不憚壽梨之役如斯古道足示來茲至  
先生之藻思霽霞朗懷擬月河梁贈答李都尉賦比鴛

鶯文酒縱橫。正平詞高。鸚鵡澧蘭湘。蒞入字俱香火。  
繭冰絲裝書。是錦篋中。斷簡皆成。安石之金坐上。微談  
欲奪王戎之塵。使其得逢李洞。應教佛事。閨仙若令獲  
遇。庭堅定欲堂名。大雅者矣。嗟乎茂陵已往。還傳司馬  
遺文。徐國重過。不愧延陵挂劍。是刻也。非直垂久于吟  
壇。實用隱裨於世教也哉。

同岑集序

蓋聞百年之運。藉聲氣為盛衰。一人之身。視交遊為進

退故尚稽列國名卿傳贈答之章下及累朝君子賦燕歌之什一時聚散千古污隆此其所關非偶然也予友冒子巢民英年振藻蔚豹上京中歲辭榮伏鸞南國驅車海內見玉帛于漢唐贈紆人間歷盤敦于鄒魯所紀同岑一集何啻名山萬言然而考厥姓名叙土風者凡十五國稽其歲月換霜雪者迨六十年其間世事之遞遷以及人情之迭異覽其始終之數不無今古之懷矣蓋世值河清人當霞蔚菁華未竭朝修振鷺之容風義



相師戶守雕龍之業士龍入洛首謁茂先文舉登門曾  
通元禮於是置鄭莊之驛雅愛琴樽開謝傅之堂惟談  
書畫先進之過後進豈待識韓今人之似古人偏能說  
頂但有彈冠之望多無按劍之嫌當斯之時亦云盛矣  
洎乎金刀匿耀玉弩斜芒時號三君人分兩部顧厨競  
長寧非角上爭蝸蜀洛連衡何異穴中鬪鼠然而愛名  
如癖爭摹郭泰之中養譽為高并伏王咸之闕奔車塞  
路入太學以看碑舉袂連雲聚華陰而成市昧危機于

白馬願學清流申明信以丹鷄恥非鈎黨此一時也識  
者憂之至于物變人銷時移事改魯殿空留其碩果玄  
都已淨于桃花知己晨星歎遼陽之歸鶴天涯夜月聽  
白下之啼烏然而皂帽相逢青樽無恙南山種豆堪為  
楊惲之歌東海成桑且飲信陵之酒公子登臺而作賦  
美人刻燭以催詩于此為歡嗟其晚也乃觀所載悉采  
其華或授簡梁園寄幽情于草木或飛書衡岳寫別緒  
于山川或感時世之艱危而勉存忠孝或言性情之敦

厚而併及篇章則有陳董王曹引鄴侯為小友文姚倪  
范許蘇軾以奇才漳浦見而傾心機部聞之捧手此皆  
正人之望同膺國士之知繼而西銘倡羣彥于吳中伯  
宗聚多賢于江左泖湖三子爭駕舒章蠡水四家齊鑣  
士業姜郎伯仲領泰岱之英侯氏弟昆擷汝嵩之秀朱  
子鴻翔于西蜀黎生鳳翥于東甌莫不接席交歡登堂  
展拜兄袁弟灌合氣誼于班荆大孔小楊結心知于佩  
帶併屬一時之快事寧堪千載之傷心若乃天水司農

最後合紀羣而締好廬江宗伯于茲集嵇阮以論交綵  
筆紅箋叙歡娛于亂離之後銀箏玉管雜慷慨于歌舞  
之間老子牀前時同看月舍人池上常共揮毫賓客盡  
于東南詞賦傳于中外又豈知風流雨散意氣灰頽玉  
樹長埋鍾子下聞琴之淚金門靜掩羊曇興擊箏之哀  
如今日者哉嗟乎離鴻身世暮雪難歸杜宇河山斜陽  
自老白頭似我悵舊事之都非青眼逢君問故人而有  
幾流傳簡牘遐想平生又未嘗不心傷其晚而神往其

盛也

黃大宗催粧詩序

花開東閣軫接龍鸞月照西園杯浮鸚鵡乃有淮南仙  
客江夏才人重聯鳳喙之膠再結麟文之綬小喬初嫁  
果然今日周郎二薛連婚仍是當年永叔以舊壻而為  
新壻應知玉潤無雙問小姨何似大姨忽訝瓊華有兩  
前時竊看曾疑美極難同此夜相憐定說後來居上琴  
彈綠綺調已慣于求凰車障青油橋待成于駕鵲雲濃

巫峽美人早辦牽紅雪滿梁園上客皆為浮白況景純  
幼女本是神仙而叔度名流雅工詞賦可少琉璃而作  
硯爰鐫琬琰以抽毫郎咏林蘭本是同心之樹兒名芍  
藥原為並蒂之花鏡裏雙栖自信人行暮雨屏前一笑  
何妨婢喚春風帶萱草以宜男薦石榴而多子雲英有  
約莫教龍腦頻添京兆多情留取蛾眉待畫

汪蛟門舍人十二研齋詩文序

蓋名文難于富貴得之必有前因才子少於公卿生也

定多靈貺故少瑜鏤管一束不自人傳王勃麋丸盈袖  
有因神與寧無因而致將有感而通耶予友汪子蛟門  
道不虛行才真間出李學士生由金粟徐騎省家本玉  
勾論美梨花傳自玩鷗亭上名高視草棲當集鳳池邊  
暖護青綾宮漏方傳花外神遊紫府珮聲若在雲間國  
有華胥欲聽鈞天之樂地非蓬島還堆元圃之珍所得  
而無非夜光有獲而不殊鼃采石卿引類數符禹截之  
山川即墨為朋象協周天之辰次陳之雕几薦以寶函

或環號辟雍或船名太乙或擬蒼龍而橫沼或比玉兔  
之朝元或紅絲金線之殊形或蓮葉松皮之異製或馬  
蹄之與鳳唼或綠雪之與彤霞端德人而歛俊人溫潤  
實同于良友水青色而土紫色精華盡產於名山咸用  
守以神人乃共貽之君子承之蕉影堪抽虎僕之毫試  
以松煙各吐龍賓之氣汪子遂遂而覺已悟萬物之歸  
虛栩栩而思若覩羣珍之宛在爰題所處聊紀異于漆  
園并繪為圖乃徵奇于墨苑歷左思之一紀可歲歲以



研都竟劉穆之終朝足時時而染翰倘景文之修唐史  
直須分捧金釵若清真之訂大晟早已環生玉琯高唐  
作賦還登巫峽之峯閬苑讐書儼坐層城之閣信文家  
之快事誠藝苑之嘉徵也昔軒帝好奇惟聞墨海衛公  
多嗜僅見結鄰鼉磯但重于眉山雀瓦難求於漳水暈  
殊徐氏誰能與月盈虧池匪王家罕見有雲浮動山骨  
何曾有對巖花未易多求而取于一夕之寢興尤見多  
奇之璀璨信朝廷之制作不在異時將海宇之文章定

推斯手行見于闐青鐵書成特賜張華豈只唐苑玻璃  
賦就惟酬李白而已哉諸君子傳之歌咏紀以篇章為  
想為因未測綬笥之兆載言載笑嘗過畫舫之居但能  
滴仙露于蟾蜍爭揮麗藻是即泛香雲于鴈鵲已應奇  
逢矣

閏五月二日山塘泛舟序

著策歸奇初增桐葉蕤賓應律再吐蓂莢枝雖悽如屈子  
之騷不堪更讀而勝似駱丞之序可擬重游爰泛蘭舟

同蹇桂楫地稱虎阜是泰伯之山川人有烏衣盡王家  
之兄弟葡萄百斛穩載中流楊柳千行分披兩岸水環  
花市綠波時泛幽香風颭酒旗翠幔偏多妖麗玉簫金  
管宮袍迴出人間錦纜青簾畫舫渾疑天上披襟長嘯  
雲開黃雀之風倚櫂高吟霞照翠鴛之水昔子桓叙往  
僅傳沉李浮瓜李白言歡但謂坐花醉月茲則極山川  
之盛窮文酒之娛方之古人殆過之矣况乎能謳車子  
喉聲絕似哀茄並坐王郎手色難分玉麈飲惟文字朱

無瑕雅解行觴望若神仙許飛瓊還為舉慢誰為觴亂  
遇諸昆總在蘇州曾見水嬉笑此客剛來湖郡此又逢  
歡場于意表得韻事于情中傳之近今未易有也嗟乎  
百年旦暮彈指無多四海烟塵傷心特甚少閒人之似  
我茲行不減子瞻此何時而不歌是語恒思游道

古重九平山堂讌集詩序

蜀嶺斜分是陸子煎茶之井平山右峙有歐公種柳之  
堂萬字千鍾尚記春風長在十年三過忽教明月虛懸

幸逢七葉以鍾賢用乞一麾而守郡棠堦敷政何殊召  
父重來蓮幕論文無異醉翁再出五百年而復建信有  
前因二三子以克襄爰成舊蹟朱甍傑閣還看欄倚晴  
空皂帽扁舟頓許笏夫秋爽于是伊陽高士首振靈筇  
文正名孫同攜蠻榼賦有天台傑作詩傳長慶新篇廣  
平得意于梅花文暢搞情于木葉王夷甫高出風塵周  
伯仁偏多節概斯擅風流于江左並高月旦于淮南者  
也若乃名重湖山咸推季重才雄湘漢獨許胡威清平

調美于梨花閨閱名推于大樹太冲則紙貴三都茂先  
則書連十乘或稱釣鰲之客本在山東或收買駿之金  
同來冀北聚衣冠于五地總屬英流開樽壘于三秋偏  
多勝賞時維訪古何言露冷黃花節展薰旬正見霜凝  
絳葉窻中畫障收兩地之山川檻外雲帆帶六朝之煙  
雨玉鉤何處香土空留綵樹當年斜陽不盡烏啼滿地  
弔帝子于空陂鶴駕三山眺仙人于別館既憑高而極  
目遂望古以多懷義取同時題分集事吹簫橋上長吟

杜牧之篇授簡樽前各奏江淹之賦對青峯于故國煙  
花殊勝他鄉聚綵筆于名流風雅寧誇隔代歐蘇復出  
驚看壁上龍蛇高李相逢醉喚巖前猿鳥登斯堂也洵  
不樂乎至于遼鶴成仙還矜嚴藻漢龍在首本擅弘才  
登玩鷗之亭誰非妙選入射雉之里尤有清風夢筆再  
見于少瑜觀燈復推于仲衍望偉太丘之冑名雄高密  
之支題曹碑而彌見色絲和郢曲而仍飛白雪斯則名  
賢倍于鄴苑勝事邁于梁園者矣況乎子美分題少文

飛札元卿振拊節之音叔度極觀成之美也哉爰濡鼠  
毫用題魚鱗相如後至何辭梓澤飛觴逸少先書實媿  
蘭亭染翰也

何雲壑轉運集字詩序

鶴郡重來夜月吹簫之路龍門新陟春風傾蓋之交十  
載相思人逢水部三秋共對曲聽山香北海瑤樽杯底  
隋堤柳色西園金管檻前空閣梅花爰出集字一編命  
為弁言數語夫詩緣至性實本別才聚腋成裘裘合而



寧知是腋將花釀蜜蜜成而無復為花此豈屬乎人能  
良亦關乎天巧若乃五音迭奏并合宮商雜絃相宣自  
成機杼相其體製風華不讓齊梁攬厥篇章大雅無傷  
李杜斯則王夷甫之玉立自具神姿寧獨謝安石之碎  
金徒誇寶屑而已哉置之笥內應函雲母之封付以筵  
前可協雪兒之奏矣

宋武葵滄洲集序

歲當淵獻月在則陽言尋新浦欲泛太湖訪霜信于吳

楓問山香于楚橘過宋子武葵之居而憇焉門庭蕭閒  
圖史晏閒居然東晉名流遂作西園雅會留連徐榻還  
聞蘇渙之高吟整頓吳檣更理王猷之逸興陶家通子  
解荷籃興荀氏慈明能持杯竿蓀蘆內住此中大有  
人桑柘閒談不知何者是客于是同將雙屐并曳孤筇  
鼓枻滄波直探金鼇之窟振衣絕巘平臨寶鷺之宮水  
是三萬六千琉璃作鏡峯則七十有二翡翠開屏高深  
異趣而齊妍晴晦同時而迭變菊宜冒雨何妨角墊烏

巾葉始從波不覺毫飛絲管乃宋子賞心冰壑奮力雲  
泉推後挽前濟勝每從康樂倡予和汝驚人獨愛玄暉  
豈非鶴羽出塵霞姿超俗者哉爾乃文園給札意倦游  
梁平原駕車興思入洛龍精照耀發張華宅內之書駿  
骨低昂問郭隗臺邊之價黃衣入夢賦許淩雲紫綈裝  
褫篇名繁露此固南琛之所以入廟而東箭之所以登  
朝然而指北道以僦裝將游虎觀涉東臯而成趣猶想  
鷗波藉卉何時千里暮雲之句班荆此夕十年秋水之

言字欲嘔心都盛古錦文堪浣手盡染名香託藻思于  
兼葭寄幽情于菡萏題所著稿命曰滄洲斯其寄託實  
為深遠矣若夫東都車馬爭看槐市之碑南國盤敦狎  
主芝廬之會過兩京而曾逢郭泰來六館而競識何蕃  
翠嶺黃河覽神皋之鉅麗金儀石鼓探天府之珍奇貫  
酒旗亭王李下聞歌之拜停車燕市荆高醉擊筑之聲  
則穆然而思慷慨當以慨其所得也不既多乎昔顧況之  
歎香山居寧不易韓愈之見昌谷軒為頻過當今不乏

龍門此世寧無狗監何待長安市上碎正字之胡琴而  
向會稽亭前羨中郎之椽籛也哉

翁蒼牙見山樓詩集序

時維乙卯序屬嘉平予方息駕蓉湖掩關松嶺而翁子  
蒼牙將獻書于闕下特停棹于山中言尋點易之臺共  
坐聽泉之閣河山眺覽連宵捫虱之談風雨留連半夜  
聞鷄之舞命小紅而倚笛浮大白以揮觴爰出一編俾  
為數語夫律呂之合先以氣機華實所分由于識量翁

子留心當世肆力古人比賈誼之弘才羞同絳灌如東方之博覽兼讀孫吳既學劍而學書亦能經而能史予嘗與之盱衡往昔籌畫近今凡所指陳皆當切要信管敬仲稱天下之才豈陸士龍擅雲間之譽乃開卷獨得閉戶自甘方予承乏于茗川諸客咸依于荆土翁子超然遠引持正無阿恥言毛遂之處囊畧似陶潛之度履迨乎讒興解組鬼見張弧羅無雀而誰來壁有蠅而空點乃獨舉幡漢闕慷慨而明司隸之寃射矢聊城宛轉

而救齊人之困此其品詣自屬懸殊更覽諸篇悉稱名  
作或悲涼對酒抗如擊筑之音或綽約尋花婉似鳴琴  
之奏或奔騰迅烈同萬馬之嘶風或淡蕩淒清若孤鴻  
之叫月莫不舍任吐謝軼孟凌王縹以繡絲炫目蒲桃  
之錦薰之艸木移情蘭芷之香詩之不易知固如是矣  
人之未可量又何若耶冰雪各天烽烟四海時乎不再  
勉為萬里之行去矣毋忘酌此二泉而別

宗定九新柳堂詩集序

成雙美譽早傳於參佐廳前第五高名不減于驃騎省  
內乃有方城之碩裔是為淮海之俊人琴響四山身能  
入畫風乘萬里志不須舟羨平輿而鱗躍雙龍在扶風  
而眉先五馬蓋廣陵有二宗子而定九其首稱也定九  
與余生同梓里雅聞兄事衰絲長並芸窻未敢兒稱德  
祖眠當共被夜舞司州出必同車朝遊洛市曲江虎視  
一時雄長諸侯文樹鸞寧四海羣推六子時而登筵授  
簡彼獨探珠或且共席揮毫我為焚硯乃半生作吏徒



教小草傷心而十載著書益覺芳蘭竟體茲復來歸故  
土迺獲快讀新篇香出行間如寒石葉花生字裏似握  
金荃杜樊川之夜月瓊簫寫淒清而未盡韓君平之輕  
煙蠟燭比華婉而猶多疎雨梧桐清而更麗秋風落葉  
壯不傷豪號才子於西崑擬佳人於南國宜當沉香禁  
苑橫施七寶之牀豈只賣酒旗亭獨下雙鬟之拜而已  
哉嗟乎宗子張思曼楊柳一枝謝康樂芙蓉十畝相如  
妙曲對操花前楊惲新聲悲歌酒後何當息于六月而

况假以百城乎

汪石西先生詩集序

余嘗上稽往帙歷覽閎文漱芳澤於藝林振華風於學圃其間英蕤所結可昭著於必傳胥賴來葉之賢能表揚于勿替所以潯陽處士邈往烈以稱先康樂名侯賦高言以述祖而吾於石西先生之集重有感焉先生韞奇志而未彰秉潛修而弗耀南陽抱膝望梁父以長謠北庵移家傲少陵而獨嘯擊酒餘之缶長聽歌烏棹花

下之舟時看放鶴無義熙之情事而賦本於經非天寶之亂離而詩堪作史計沉酣於韻府凡五周星迨滅沒于塵甍又三甲子其玄孫天如謂奉先君之遺訓委在棘人迺以高祖之藏書授諸棗氏借文章之力用展孝思任編輯之勞仰承前烈又得叔定蛟門兩君子精心選訂極意校讐俾一代之弘章偕栢菴而媲美百年之文澤與環谷而俱傳豈不懋哉曰觀止矣獨是先生當昭代之極盛值七子之方興俗尚華危時工鞏繡先生

抗無求之節欲繼襄陽振獨秀之音仍標正始其氣靜  
故詞博而昌其致高故調清而越英華收于六代格律  
本自三唐倘非蒐輯於汲冢之餘掇拾于秦灰之後則  
魯碑奇字將盡失于蝸涎而孔壁遺文且難全其蠹簡  
將見百八十篇不聞雅頌之聲豈止三十餘年尚多殘  
缺之恨也哉

家岱觀大令西塞詩序

蕭關夜月悲涼生壯士之心榆谷黃雲慷慨動英雄之

色短簫別部樂奏白狼鏡吹新聲曲翻朱鷺此則王侍  
中之念國五詠從軍杜拾遺之憂時重吟出塞者矣而  
況地當隴右險歷重關人在河西雄瞻四郡嵯我鐵嶺  
有秦皇未築之城迢遞玉門是漢使難歸之路其為興  
會何可勝言也哉茲我家昆為時國士名如闕澤常在  
月中才似徐陵本來天上起文人于聖水兩河光繞鳳  
凰作仙令于仇池百里語分鸚鵡沉香有浦猶存酌水  
之清風賦句為唐重續浣花之勝事折腰自懶俄聞處

士辭官抵掌相歡乃見將軍揖客碧油啓帳聚米雄談  
白氎登筵揮觴獨嘯鄒從事之叅陪峴嶺共睇山河杜  
舍人之管記揚州非誇烟月于是有心懷古橫目問天  
振衣蔥嶺之峯頓轡蒲昌之海經先零之故壘遐想營  
平歷疏勒之遺屯長懷定遠爾乃月氏空屬日逐難迎  
買駿金多偏駝紫索落鵬弓勁或射黃羊中行說久自  
多端呼韓邪時方競長旗翻烏壘猶傳都護之營陣列  
龍堆徒獻郎中之策此其邊算是在廟謨況乎橫笛頻

吹哀笳互動蒲桃竟夜不醉離心楊柳無春還驚客眼  
驚沙似雪雖蘇武而難餐冷月低空有明妃而不照則  
復情因境發憂為時生磨盾疾書據鞍高唱將王公之  
捫虱譜以四聲用劉子之雕龍傳之七字安危目繫豈  
徒自詡文豪忠愛情多未敢便誇詩史然而吐音激越  
似隆中抱膝之聲抗節沉雄有廣武登城之意若杯酣  
于夜讀酒合頻澆倘劍冷于宵吟壺應自碎旗亭畫壁  
彼雙鬟不堪再唱黃河詞苑探珠當四坐已自爭推白

雪也

周隱求自怡草序

蓋有彭澤之高風而後飲酒移居見其曠具襄陽之逸致而後微雲疎雨見其清固自別才實由雅韻古之論者或未詳也吳門周子隱求鶴市英流鷄林妙選劉公幹之在鄴本文學以知名丘靈鞠之入梁由茂才而起譽而少輕世網早濯塵纓爰能有託而逃罔羨無因之獲偶然賣藥不從女子求錢終日下簾長笑富兒多事



間復盱衡今古覽眺山川積有篇章分為卷軸梁生適  
越不無五噫之歌平子傷離乃有四愁之賦莫不留連  
宛轉清麗芊綿得意行間傳聲格外比之香草送異馥  
于秋風譬彼芙蕖耀華姿于曉日爾乃取嶺雲而自況  
借都水以為名此其寄懷從可知矣予嘗造其寢處與  
為燕歌能于湫隘之中獨出風塵之表過從有客是蓮  
社之高人蕭閒無營只藜牀之雅具輒復披帷而想元  
度過戶而歎宋纖信其隱于文詞未易求之章句也

哀重其母太君霜哺篇序

拜義成之冊未必皆魯國之貞姑受遂昌之封豈盡是  
劉家之列女而寒廬少婦抱影終天委巷孤嫠推心永  
夜既不能捧鸞回之紙聊種忘憂亦惟有啼鵲化之魂  
空悲長恨自非令子誰識其名不有文人莫傳于世蓋  
秦徵赴子胥之飲雖僅三齡吳母保趙朔之孤家惟四  
壁心同夏草雖向日而偏枯身似秋蛩每逢霜而自泣  
呱呱在抱影寒五夜篝燈藐藐空存力盡百年砧杵塔

前畫荻總是淚痕案上九參惟多苦意卒成佳士早有  
令名常繫馬以延賓共識陶親之義能辭鷄而饌客益  
嘉茅母之賢是以見孝尼者許以正人憐伯姬者旌其  
篤行女歌泛栢遂幾黃髮之年子詠采蘭無忝白華之  
志名流作傳用勸其家鉅老稱詩以風斯世積之五十  
餘載無非雨夜霜晨遂有百億萬言不減龍文麟篆而  
重其每獲一字輒跪進於堂前或取數篇為拜賡於尊  
畔而節母怡然進酒莞爾加餐啜一菽以如飴斥三牲

而弗御以視世之文軒綵綬起居誇八座之榮金軸銀  
函焜耀極五花之賜而內行弗備君子羞稱大德無聞  
哲人勿道誠相懸于河漢而永賁于星雲矣蓋古人節  
孝之事顯於詩書而昭代文章之榮久于富貴有節母  
之行則貳心之臣可以慙聞重其之風則敦本之人知  
所重矣

梁溪倡和詩集序

蘭亭歲月憶前後者屢更梅里溪山凡往來者多次時

則阿衡受命分百里以牽絲宗袞當官宰一方而製錦  
冠平仲之相業肇績巴東秋懷英之勲名始基冀北余  
謬叨族誼忝奉賓遊鏤管文樽忘憂孝王之館華燈朗  
月登高鄴苑之臺坐滿鄒枚下客空憐司馬調傾元白  
君侯獨羨探驪竊歎文武之才當乘風以破浪早知將  
相之器必緯地以經天乃自結主知未踰五載而差強  
人意洊致三公較相如之諭巴蜀小行人烏足道哉繫  
尉陀而歸朝廷大丈夫當如是矣而言思舊雨近屬晨

星或金馬浮沉寥落子雲之閣或窮鳥伏處栖遲仲蔚之園或杳藐河山悵黃墟于既往或飄零湖海嗟皂帽之不逢而公獨致雲霄手揮雷電以仗鉞而兼工草檄當橫槊而猶憶賦詩斯則命世之英豈獨亢宗之傑而已哉原夫勾吳之始實本仲雍迨自延陵以來不乏李子然子顏龍占未聞作賦之能李重鳳觀罕見濟時之畧茲兼二美獨在一人況乎天遠五羊風清一鶴憶山橋于月下長懷知管之言望幕府于天邊徒有依劉之

望池塘春草靈運寧不憶夫惠連海浦沉香道助將無  
慚于附子耶

陳集生影樹樓詩序

曲逆長才曾居委巷元龍豪氣獨據高樓緬想伊人恒  
傷異世而吾友陳集生者抱奇不偶懷古難羈一寒而  
恥受人憐三北而無求世用風貽清白知無愧於豫章  
口絕雌黃信有傳于潁水較相如而猶無四壁比子猷  
而僅得一羶而雅愛名流恒多俠氣八方縞紵乃厨顧

之人豪五色繡絲是蘇韓之上客高明滿野時時逢鮑  
五之車雄辯當筵處處驚孟公之座自言熱血可以贈  
人但有寸心何妨結客綈袍典酒清談而欲醉平原本  
榻栖霞高臥而長留孺子以故名卿鉅老願相得以成  
歡素士平流亦投交而恨晚斯固好行其德獨秀於時  
者矣胡乃過愛陳人虛推薄藝雕龍自好譬劉勰之見  
隱侯烹雉何心比茅容之逢郭泰榮枯一致寧同門下  
之盈虛久暫無忘每問山中之動靜其為嚮往不更異



乎頃以一編索我數語謂必加之月旦始可定其風期  
蓋詩之為教復性本於緣情聲之感人因心迺以達志  
集生之志可謂通矣集生之情可謂篤矣由是而本乎  
忠愛發為竽瑟之音聽以和平鬱乎山川之氣古人可  
到寧須芍藥以抒華此事必傳非復葡萄而織錦心乎  
愛矣庶或遇之

汪扶晨穀玉堂詩集序

馬遷著史窮河嶽之觀張說為文得江山之助良以才

華之動蓋亦靈秀所依也余友汪子扶晨秋月長凝朝霞獨舉論交四海早看聲徧龍門作賦三都盡許才傾虎觀桃花潭上水讓情深斤竹嶺前山隨興遠何年丹竈嘗尋軒帝之峯幾處仙廬數訪焦公之洞二分月裏留連隋苑之風烟千尺雪中感慨吳宮之花草每經屐齒輒付奚囊時染絲毫動盈宮紙他如河梁贈答李都尉字裏鴛鴦公譙綢繆禰正平酒邊鸚鵡莫不低徊盡致俛仰多懷譬之初日芙蓉未可方其婉麗擬以微雲

河漢差足況其清華是以聽者傾心見而却步藏之笥  
篋如聞草木之香寫以縑緗即起雲霞之氣之子於焉  
寤宿先生可當臥遊矣予附響鷄壇投交鶴市吹簫故  
里長逢濁酒以相娛剪燭秋窻每出奇文而共賞心之  
愛矣將置身於今古之林子好遊乎信得意于山川之  
力也

孫樹百給諫保留虎丘山木詩序

白象秋園應靈期於乾竺青牛夜走失王氣于咸秦況

此海湧之奇峯賴有雲屯之古幹綠陰百畝皆累朝雨露之遺黛色千尋是大地煙霞所托豈意作茲舟楫遂欲殘以斧斤在經國之弘謀寧問無知之草木然救時之大體務留不盡於山川賴有偉人適臨勝境推竹西之棠蔭分庇東吳用冀北之梧陰遠垂南國回天運掌無煩六叟之鼓門當路同心共鑒萬民之跼地遂使武侯古栢青蔥於短簿祠前遽父仙楠蔽芾於生公石畔人天歡喜還如再長菩提士女謳吟竟似重開菴畫六

代之鶯花如昨兩山之烟月依然斯其所全良為大矣  
至若省吏胥之漁獵以莫人心免山水之髡鉗以全地  
脈務令林安翠葆無傷羸政之殘庶幾閭建銅壺不損  
蔣堂之惠此又仰裨于軍國非徒祇益于遊觀而已也  
倘木德之有知同應下拜幸山靈之無恙請共式歌

家茂才一壑居士桐江草序

吾家自荆土以來延陵審音而後風雅之事代不乏人  
柱史揮毫首變文章之體舍人傳樣益高著述之名雖

時世屢更而咏歌無替良亦家風有在不以世遠而衰也丁卯初秋時方却掃迺有小年族姪特攜子晉先生所輯遺詩屬予為序予受而卒讀因為慨然曰先生以建安之才值永嘉之季遭時不偶徒嗟猿臂之難封失路無媒遂抱龍頭以終老椎雄博浪僅中副車門掩明湖空懷鏤管當年沈約曾加禮於投書此日范宣尚興嗟予予硯天乎不慙命也何如然覽其篇章若清風之拂蘭蕙擬其姿態如初日之照芙蓉使其獲售荆山遇

知冀阪當不在子雲之下亦何減季重之時哉猶幸小  
年言念厥祖收菁英于版蕩之後授梨棗於壁立之間  
襲此芳風用流馨於藝苑傳茲大業同永壽于名山是  
將有賴乎亢宗豈僅無慙乎肯構也哉詩曰繩其祖武  
小年有焉又云貽厥孫謀子晉得之矣

江秋水園居倡和詩序

江子秋水性耽林淑癖染烟霞有謝幼輿之一丘開蔣  
元卿之三徑亭中花發不見俗人池上詩成每同詞客

向值西園之會言來東海之踪笑杜牧之顛狂逢花便  
住愛淵明之蕭散得酒還留曾未幾時遂同昨夢倚欄  
明月是當年薄倖之樓繞檻清波異昔日醉歌之墅燈  
前紅袖誰憐往事都非花底黃衫尚喜豪情如舊既經  
秋而涉歲或卜晝以連宵邀中散以彈琴遇桓伊而弄  
笛紅箋小字常為錦帶之篇紫袷高吟競賭金荃之句  
音成山水非無絲竹相關坐有鶯花遂覺壺觴都韻爰  
多名作并寫烏絲共賦閑情皆題黃絹少間人而似我



寧須問何處烽煙願勝事之無忘且莫負吾儕詩酒也

田綸霞詩序

蓋聞九光霞錦不襍凡絲萬石霜鐘非同細響建安創  
體皇哉大雅之文正始成音允矣中和之氣非其性情  
之各別要亦風格之本殊也綸霞田先生銜書北闕校  
藝南畿士相慶為得師人由是而知學而先生提衡經  
術雅居兩漢之間領袖篇章亦在六朝之上跡之所至  
事必可傳本無累以為神故能會高深於山水涉不窮

而成趣故能極俯仰于古今氣自國香不藉薔薇之浣  
味原神鼎匪同芍藥之和藏以篋中經三年而不歇坐  
其碑下過十日而猶思以此驚人良堪永世矣而情以  
日生而益上詞以屢變而愈新五言既號長城七字亦  
稱堅壘近體已見精嚴而古調仍多閎肆孔雀之羽豈  
有擇於山鷄鳳凰之聲自罕同於鸚鵡則安見杜拾遺  
之後不別有拾遺而韓吏部以來不再見吏部也哉然  
具昌黎之氣節而後起八代之衰有少陵之胸懷而後

集百家之勝是必有其人而乃有其作所以重其作而愈重其人矣

曹冲谷漫遊草序

十年公府清遊曾共陳思千里故鄉雅政還同任昉歎當年之匏繫思隔停雲幸今夕之萍浮歡邀坐月得逢公子紀羣兩世之交如覲故人嵇呂三秋之雅維時清風欲襲羨洗馬之神清既而明月相投識士龍之才俊偶看操筆已見湧泉旋覩傾筇還同霏雪象諸六律斯

為琴瑟之音譬彼羣芳此有蕙蘭之氣則冲谷曹年翁  
漫遊一篇所以獨絕于時也昔孫郎布履至德為之傾  
心符子清談李膺因而捧手予欽國士早知日下無雙  
君覲嚴君為道山中未老

顧書先梅花詩序

人存標格雋則多風物有性情淡而能韻家多綠竹而  
愛者必謂瑯琊歲有黃花而採者獨稱彭澤惟其神之  
相似是以得而益章也予居種字林中時值丙寅春半

長卿室內賦成非以求金潘岳園中客至常同藉卉而  
書先顧子示我一編寫庾嶺之幽姿傳孤山之逸致行  
間吐艷更欲洗其鉛華句裏生香遂若聞其浮動水邊  
林下珊珊而若有人兮月落參橫寂寂而誰為是者蓋  
其胸原無熱長多冰雪之懷是以語可出塵大有煙霞  
之氣讀之三過應知春在兔毫對此終朝但覺雪生烏  
几豈必窻前夜發始見相思簷下朝巡方同索笑而已  
哉予也手鋤明月將種樹以忘年子則口嚼香冰且借

花以寫照矣

程山尊春帆集序

歲載蘭亭之筆人歸梓里之車索鑿齒於坐中遇孟公  
於門內雖披襟之頃已信生平當傾蓋之餘如曾夙昔  
蓋予與山尊程子始訂交焉於是雪磬霜鐘共臥秋風  
之被紅燈綠醕常同夜月之尊杜牧顛狂因花就宿許  
詢蕭散得酒舒懷而程子筑響情生杯酣耳熱王郎擊  
劍嘗為斫地之歌屈子懷騷數作問天之想若無以自

得者豈有所不足乎蓋程子世累朱纓曾依日月身懷  
白璧雅志風雲不問家人之有無兼值世途之消長入  
孔融之座未許錢通讀馬遷之書恒刪貨殖時非得意  
氣益自豪以此發其新聲頗可稱為絕調山以不平而  
增秀水因多激而長鳴故其諸體并陳咸無堅壘更以  
五言占勝獨號長城颯然風雨之忽來燦若雲霞之迭  
起聲能擲地聽下士如笑蒼蠅語必驚人在諸君應推  
繡虎星辰可動宜呼于華岳峯頭花木無私可置之錦

官江上蓋其情深而力厚故能律細而聲宏也嗟乎程子狂如李白是唐家有用之才罵似禰衡乃漢代不平之氣吾儕未老此事必傳矣

田牧園滇行詩序

人同汝水種棠樹而偏多我愛樊川插菊花而可共爰于豕渡特訪鶯求而田公牧園初迴渤海之轅已解潯陽之綬從容對酒意殊眷於三閭慷慨論詩字已盈乎一卷夫半生廉吏值陪紫馬之游萬里行人竟作碧鷄



之使懷簡書而可畏懼飛輓之不前况乎鸚鵡洲邊頻  
更舟楫兼之螳螂川上甫戢干戈過金筑之鄉關梁匪  
易宿銅安之驛鼓角堪驚遂使時異當年歐陽詹徒修  
玩事路迷何處杜子美惟有傷心荔酒椒盤俗非荆土  
石泉槐火夢繞吳天計程而道遠九千經歲而月圓十  
二離人易感既有見而情生勞者常歌亦無聲而不苦  
此滇行諸作雖少而必傳也既往論交已識伯仁雅量  
茲來問政並知仲舉清風知公之才信驥足不終于千

里讀公所作豈鴻名惟競乎一時耶

丁鴈水觀察暨令弟韜汝棣華集序

昭陽理楫將攬勝于羅浮長烈停車暫觀奇于章貢三  
臺並聳有李相國望闕之鄉八境遙開是蘇學士尋山  
之處則有夢松碩彥列栢英賢文章則韓柳齊驅政事  
亦元常方駕橫牀匝月論心于山水之間剪燭連宵合  
意在雲霞之表松陵分賦衆獨讓其探珠蘭畹填詞復  
共聞于戛玉抗懷覽古秋風擊筑之聲盡致言情細雨

吹笙之曲烏絲寫就直須手浣薔薇紅豆拈來都訝身  
如菡萏此則齋分一坐誰言隴右惟三牀拜雙鬟不讓  
河東第七矣爾乃既逢康樂復見惠連已識伯仁還交  
仲智偕工協律香浮十樣之箋並善倚聲艷發五花之管  
兄如淮海何殊山抹微雲弟擬小山更愛岸停殘月因  
為擊節共羨同車夫詞原本于騷餘辭必歸于雅稱而  
近之作者或極意以爭新人競從之皆效顰而取拗不  
知聲期應節其何取于聲牙語貴宣情復寧求于借面

茲則調高北宋采奪南唐獨追正始之音允叶開元之  
奏可謂盛矣豈不然乎至若宗臣寶臣並獲名于景祐  
敬禮正禮亦齊譽于建安皆號雙丁同稱二妙斯乃鍾  
靈晉水復見拔萃濟陽以古視今後來居上矣壽之梨  
棗名曰棣華豈獨三筆六詩羨劉家之有集聯珠列宿  
美唐代之多才也哉

石源上人詩集序

神駿非常服支公之愛馬昭靈莫測嘆老子以猶龍古

之所為垂乎不朽大抵立言必有奇氣而後其勢日生  
暨乎入世必有遠神而後其風自上用觀昭代不易吾  
言乃有西竺之異人來於東甌之淨域則石濂大師是  
其人矣師以白象之姿悟紺龍之旨冥心濟物未忘有  
覺之弘因妙義超羣已證無生之密諦而城長五字壘  
固四聲渾成頗類貫休高亮更同齊已暮雲自合江淹  
擬而未能新雪常逢鄭谷吟而獨嘆爰聞下士笑彼蠅  
聲每見時流目踰牛背望之或以却步識者偶為注眸

予一見於柰園已謂風塵外物載逢之運社愈知濠濮  
間心遂與論交慚非魯公之偕清晝因同索句若如蘇  
子之遇參寥時而清露流桐愛鳳條之初引時而驚飈  
振葉聽鴈語於方來時而峭壁秋開陡絕風雲之路時  
而奔濤夜至砰喧霆電之音莫不海立山飛星迴電激  
去塵言而務盡振灝氣以無前終日與靜者談舉體無  
常人事乃知靈鯨吼雪非凡響之可同翔鵠摩天豈纖  
禽之是伍而況乎李桃之俗艷蔬筍之餘酸也哉昔古

人之未遇常遁跡於空虛而高士之不平每陶情乎歌  
詠師殆其流亞矣寧知所際量耶

季偉公詩集序

余浪跡尋梅特作五羊之客潛心藉卉將求一鶚之人  
乃有<sup>缺</sup>

言與偉公季子來過花下共數心期間

向酒邊還為耳熱而季子早多奇志獨具性情壯等終  
軍方棄繻而未果吟同杜甫維敗案而不知蓋積之者  
既深而發之者必厚故能由微至著劍雖藏而有光以

少勝多矢無堅而不入然辭多感慨疑非年少所宜而意在激昂或亦古人之過則韓昌黎之索句窮而後工司馬遷之著書言皆有托吾儕之所聞也李子其有憂乎雖然十九人中誰如毛遂五百年後必知子雲君子但居易以俟老人將聞聲而思矣

宋長白岸舫集序

羊城訪戴時乘蘭葉之船鹿苑逢陶共結蓮花之社軒軒霞舉欲為東野低頭奕奕風清足令西崑斂手由是



而三瀧挾弩不辭埭歷蜈蚣乃復五岳同登寧計峯迴  
鴻鴈瀟湘月滿大夫之江上題詩沙渚星高太傅之祠  
中酹酒或襟分於楚水浮踪歷萬里而遙幸燭剪於吳  
山離緒寫三年之渴蕭齋夜雪酒倒銀瓶茂苑春寒花  
開鏤管王郎斫地既拔劍以同歌祖逖臨江亦投鞭而  
獨嘯蓋長白夙懷大志雅負雋才終子雲早歲入關欲  
請纓而未果陳孔璋頻年作客徒草檄以空傳若鯉湖  
若鯉海行役維艱或玉塞或金臺悲歌未已賀蘭山上

常奮筆以留題楓葉江頭忽投書而竟去才情若此遇  
合如斯寫以篇章形之歌咏雕雲鏤月山川發秀異之  
靈酒舞花飛筆墨有英雄之氣杜陵之沉鬱頓挫草堂  
之跋扈飛揚兼而有之固其所矣遐觀往代厚福者不  
少庸庸幸值興朝英才者悉皆袞袞豈有司馬雄才竟  
少黃金買賦將見元龍豪氣定能碧鏤裝書寶此一編  
君自愛其五花之管抒其偉抱吾當相待以七寶之牀  
耳

夏宁枚粵遊草序

憶昔分符茗郡乃得憑軾桐封知仲御之宗誠為多俊  
於清溪之裔實獲二難則宁枚之與宛來猶惠連之偕  
靈運迺已酉解組嘆別路以多岐至癸亥拏舟幸故人  
之相見臺高栢樹喜遇次山幕啓蓮花重開小海尊前  
授簡同賡聽鶴之篇枕內求書盡覩雕龍之字乃宁枚  
之游愈遠而宁枚之才益奇千里碧雲不減江淹麗句  
一聲白雪如聞郢客高歌譬之秋篠吟風莫名其韻遂

若晨蘭受露但挹其香五色相宣得素絲而更為絢爛  
八音競奏有和玉而始得鏗鏘此在正始以來可仰同  
乎顏謝若論貞元而後足方駕于錢劉斯粵遊之詩正  
為可傳也昔馬遷作史歷海岳而迺奇燕國為文因江  
山而得助則與其十年仰屋之空勞實不若萬里修簷  
之足快而山連五嶺盡吐煙雲巖竦七星共凌霄漢凡  
所經之勝槩可共給其清裁矣雖然上林羽獵袞袞盡  
屬諸公天祿石渠落落誰為才子以君兄弟猶困泥塗

吾為千古傷不為二君惜也

顧辛峯黔江草詩序

荆土堪依王粲作登樓之賦梁園未倦馬卿多授簡之  
辭僕本恨人不堪多讀君真名士定自可傳則幕啓蓮  
花有鱷溪之三俊香浮蕙草在黔江之一編矣顧子高  
出虞山竒同拂水長才未遇聊自隱於讀騷壯志難名  
每獨抒于覓句是以俯時傷往感流失于永嘉懷古登  
高嘆英雄于廣武驚心節序王郎斫地之歌顧影山河

屈子問天之想以至長楊芳草賦也彌工走兔流烏時  
哉不予七星巖畔李供奉語逼煙霞三水江邊謝玄暉  
悲生日夜莫不抑揚盡態慷慨言情楚澤含毫寓奇懷  
于鸚鵡河梁贈句等麗製於鴛鴦既搖筆以散珠益擘  
箋而成錦讀之擊節惟喚奈何倚以作歌殊嗟未若昔  
名如元嘆乃聞更有一邕才似彥先遂以能齊二陸以  
茲方彼何古非今耶僕以樗櫟之餘適逢斯地當菰蘆  
之內乃得此人同越石以聞鷄雖嘆相知何晚若孫弘

之牧豕寧言得遇已遲哉

孫殿颺樵吟序

端居不適相如聊復遊梁舊夢難忘廉頗常思用趙子  
以渡豕之歲始至炎海以浮槎載當于貉之時爰過端  
溪而訪硯遂與韓君公古聯縞紵之交乃有孫子殿颺  
得披帷而見相知一日憶論交曾以文章作別十年嘆  
浪跡空悲道路豈期異國忽覩故人覓鑿齒於座中徒  
憐短鬢接嘉賓於幕後自是異才也迺其流覽之餘輒

生興會凡夫踪跡所及即賦篇章收月露之文以成綵  
筆攬溪山之勝而入錦囊水可濯纓不足方其澄澈花  
能擷佩未可比其芳華色雖艷而非濃麗芙蕖以初日  
態原工而益美拂楊柳以輕風楚澤峯青似憂湘靈之  
瑟緜山月皎如聞仙嶺之笙至其贈答纏綿畧同都尉  
若夫流連跌宕近類參軍以此清才自合牀橫七寶因  
斯麗製還堪草奪五花而猶身似文通跡同翁子盼神  
仙兮不見望富貴而未來則樵吟一編烏可已矣然予



之知子有素而子之自待不凡宜漢室之公侯乃竟不  
如狗監而茂陵之詞賦遂至無薦馬卿者哉予且歸歟  
非榮期誰知孫綽子無恫也有東野自遇昌黎

厂翁潮行詩序

晉朝名士支許聯世外之交唐代英流顏謝結山中之  
契三生有石豈淺見之所能窺百尺為樓非恒人之所  
得上予為漫叟浪跡鷗波得遇厂翁論心虎阜前期莫  
負不辭拏楫而來良晤偏遙乃復披帷不見則余之至

粵始及一陽而師之遊潮已先五月矣既而冀回北律  
松轉東枝廬岳籃輿還迎靖節石泉槐火常對參寥時  
同匡坐三更爰讀潮行一帙或狀溪山之雄麗而嵐起  
筆端或寫潮汐之奔騰而聲留紙上或賓朋贈答叙情  
致以纏綿或歲序遷移慨光陰之流轉蓋相知有素偏  
逢好客陳蕃而自得為多不類依人王粲故能無言不  
韻有語皆新直從句外求禪豈啻詩中有畫而已哉昔  
人悟道惟聞擊竹三聲古德傳心只在拈花一笑以此

慧解求之正聲自有天中之天別得味外之味豈與白  
蓮為集較蔬笋之酸醎青豆成編得梅檀之氣味耶予  
罔知西竺之學頗覽東陽之書萬水千山知和尚之來  
得得三唐八代任說者之論悠悠爾

江柳州眉瞻隴塞集詩序

司馬公徧經川岳始就奇書張道濟得助江山恒多傑  
句蓋耳目所及既廣故性情之養獨深發為聲詩不可  
及也江公眉瞻以非常之才涉無窮之境一麾江海幾

盡於南北東西廿載間關數歷乎陰陽寒暑乃以所得  
咸著于篇色異繡曄是雲霞之麗采聲如戛瑟為山水  
之清音是則詞客服其探驪儔輩推為立鶴者矣僕夙  
叨葭倚謬忝荆班拏卷畫之舟曾同泛雪吟柴桑之句  
長憶停雲分手湖邊已十八年之久論心嶺表在七千  
里之餘黔峽燒燈重開白社兔園授簡頻倒青樽遂出  
一編俾予片語嗟乎人生靡定鶯欲出而傳聲世路何  
常鴻既飛而留爪用為不朽惟此長存今公所作隴塞

諸篇或寫霜雪之淒迷而興懷於歲月或紀山川之雄  
麗而寄慨于關河或憑弔遺墟而心傷逐鹿或低徊故  
壘而哀感啼鳥莫不出入三唐奔趨六代而法原風雅  
氣本中和比於香山長慶諸篇較為沉鬱方乎少陵秦  
川雜詠並著精嚴所養之深蓋可見矣夫羅池名勝既  
得子厚而能彰象郡遺思尚記河東而未泯斯則地雖  
險僻為仕宦所弗宜實乃俗尚醇愚得循良而可用公  
以惠愛之術力為撫綏又于德化之餘著之歌咏則安

見桂林境內謳頌者不再溢于南交而柑子堂前嚮慕者共恒推以北面也哉

韓公吉觀察崧雲集序

余以癸亥秋杪始至羊城甲子月中乃過羚羊峽扁舟未泊已呼船覓張憑幸舍初分早見軒臨李賀則韓君公吉似古人而折節為近代之曠聞者矣既而入襄岷之境中人懷其德見滎陽於驛內世嘆為賢府繞蓮花盡皆枚馬臺森栢樹不少求羊於是志有星巖倒篋攬山

川之勝賦同雪苑揮毫收月露之奇探驪而君早得珠  
吐鳳而衆慚其綵爰出崧雲一集用俾草澤片言夫辭  
以攄懷交發於性情之際詩惟言志長存乎律度之間  
氣不靜則不能有合於和平格不高則不能自全其忠  
厚蓋自三百篇而後十九首以來雖體製各承而源流  
不異故家分赤幟文人或自相輕然代有青緡騷客終  
難別創今君養之也既裕所以出之也甚全時序遷移  
李勉或興懷于望闕江山綿邈仲宣或寄慨于登樓都

尉河梁見鴛鴦而贈答參軍關塞覩鴻雁以低徊皆遇  
物以言懷每緣情而有作莫不嫵媚盡態寫楊柳於初  
春綺麗多華炫芙蓉于早日譬之八音競奏而清響合  
乎琴瑟亦如五色相宣而繪綵尊乎黼黻其為詩也不  
已盛乎昔石鼎吟成退之起衰于八代宮煙句美君平  
獲譽於一時當代復見名篇君家何多才子耶自知瓦  
礫殊有愧于士安願作珊瑚庶期同於孝穆爾

徐鳳池龜峯孝感詩序



朱壽昌之覓母名士悉有贈言景忠烈之尋親聖主還  
為給傳然皆生前之覲面訪求尚有音容未聞歿後之  
遺骸埋沒都無影響此非誠心之仰格何由奇事之克  
傳也哉鳳池徐君三韓名胄七葉華宗磊落襟期久仗  
仲華奇策英豪志畧行看士稚先鞭而幼值家艱早逢  
時變方陟岵而旋陟屺誰憐未乳之兒初入廣而繼入  
都竟作喪家之子南荒失路八千里馬鬣難封東海移  
根三十年孤丘莫辨見負薪之奉旨繫我獨無問上冢

以澆漿慈親安在子是不辭胼胝歷燕齊吳楚以獨行  
固憚泥塗經寒暑陰陽而不悔重來珠水僅鹿苑以依  
稀載訪梅林獨龜峯之聳峙兔葵燕麥既入望以無涯  
棘刺藤絲復手披而不得遂乃撫心捨地洒血呼天哭  
似秦庭較哀猿而更慘號同歷野比鵲鳩而還悲足偶  
升高欲陟松巖而上身如入夢忽投菜隴之中衆共訝  
其非常心乃怍而欲動爰發布金之坎果當瘞玉之區  
題識依然杳雖埋而未化鍼封宛若血尚漬而猶新雙


鶴翩翻來弔陶親之壟羣鳥翔集助成文母之墳此非  
精氣之潛通而為鬼神所默佑烏能相感以若斯哉諸  
君誼列同人我輩分叨猶子登堂既杳空懷嵇呂之誠  
展墓有心更感閔曾之孝表揚泉壤將有待于龍章昭  
示寰區寧無煩于兔穎况逢枚馬適授簡于梁園並集  
王盧共搗文于鄴苑紀貞紀孝金管與銀管齊揮起敬  
起哀綵箋共素箋偕擘溪蘋澗藻聊陳一束之芻霞爛  
雲輝總是五花之字在坐聚九州之客可知彝好不殊

傳書貽百代之人應見廉頑有賴爾

家觀莊粵遊絕句小序

歲當癸亥予家少參先後一帆並掛秋風於江上浮沉  
雙槳同尋夜雪於溪邊嶺表崎嶇既悲歌乎行路天涯  
偃息遂欣賞以論文乃出新詩得三百首計經遠道乃  
四十餘其間興會儻來莫不水流花放以至激昂忽動  
咸驚海立山飛駿馬奔陂胡可達其運腕饑蠶食箔未  
足羈其含毫此豈格律所能拘固亦神明所獨旺矣噫

嘻山川有助張燕公豈待攢眉今古無窮阮嗣宗常多  
流涕以視予二人之梗泛一身挺懸十指暮雲天畔惟  
深南國之思春草池邊不入西堂之夢者久矣寧必定  
王家之優劣何煩分裴眷之東西但愛子之詩漏三下  
必讀三過欲醉君以酒歌一首請進一觴



林蕙堂全集卷三